

# وسائل تنظيم الاسرة Contraception

By: Dr. Abd-El-Razeq Samir

01126241104

Under contribution of:-

- 1).....
- 2).....
- 3).....
- 4).....
- 5).....
- 6).....

دى اهم حاجة فى شغل الدكتور الممارس العام فى الوحدات الصحية ومستشفيات التكامل الصحى

تنبيه هام:- اول ما بتستلم التكليف فى شهر ٣ او شهر ٤ هتلاقى الادارة طالبة واحد منكم يروح حاجة اسمها "حزمة طب الاسرة" دى بتبقى دورة فى المديرية بياخدوا ١ او ٢ من دكاترة التكليف ويدريوهم على IMCI و Contraception ومتابعة الحوامل و ملفات الاعفاء الكامل وبعض الاداريات... الدورة دى بتاخذ من ٣ اسابيع الى ٦ اسابيع بس المهم بعدها بتاخذ شهادة بحضور الدورة والشهادة دى معتمدة من وزارة الصحة المصرية، الميزة الى فيها انها بتعتمد عند السفر برة لدول الخليج فبتحسن من فرصك فى الحصول على مرتب مجزى (LOL)

طب افرض انا ملحقش اسجل نفسى فى حزمة طب الاسرة، روح الادارة الطبية واسال عن المسئول عن الدورات والتدريب وكلمه انك عايز تدرب فى حزمة طب الاسرة وهو هيك تكتب اسمك معاه وغالبا هيطالبك بالاسم فى الدور الجاية (الى سمعته كل شهرين فيه دورة)

للى عايز يشتغل بس تنظيم اسرة Contraception، فيه دورات خاصة بتنظيم الاسرة فقط دى ملهاش علاقة بحزمة طب الاسرة الى فوق، دى برده بتروح للادارة تسجل مع الدكتور المسئول عن الدورات والتدريب، بس ياريت تسجل بدرى اول ماتستلم على طول، يعنى تستلم التكليف النهاردة تروح تسجل بكرة لان فى بعض الادارات لو عرف ان الوحدة فيها اكثر من شخص مدرب على تنظيم الاسرة مابياخدش حد منها تانى

دورة تنظيم الاسرة بتتعد فيها ١٠ ايام، اكثر حاجة بتتعلمها هى تركيب اللولب IUD insertion، وباقى الدورة موانع Contraception و ازاي تعالج مشاكل contraception

فيه دورات تانية كتيرة ممكن تسجل فيها منها دورة متابعة الحمل بالسونار Pregnancy U/S، دورة طب الاطفال IMCI، دورة اداريات الوحدة الصحية، دورة طوارئ النساء والولادة obstetric emergencies، لو انت مهتم بطب النساء والولادة حط نفسك فى الدورات دى على قد ماتقدر

ملحوظة تانية:- بالنسبة للمنوفية فيه بعض الادارات بتبعث على طول الدكاترة حتى لو هما ماطلبوش زى ادارة منوف، وبعض الادارات التانية محتاجة محابلة وتقع تزن على ودانهم علشان بيعتوك فى دورة من الدورات دى زى ادارة شبين الكوم

نيجى بقا نتكلم شوية عن Contraception باولوية الاستخدام فى مصر

## (١) اللولب IUD

ده اولاً اكثر وسيلة بتستخدم فى مصر (على حسب تقرير وزارة الصحة المصرية لعام ٢٠٠٩ كان نسبته ٦٠%) وبرده النسبة دى قليلة لان الوزارة فى مصر عايزة تخلى النسبة دى توصل اعلى من ٨٠%، علشان كدة كل الدكاترة الى بياخدوا دورات تنظيم الاسرة اول حاجة بيتعلموها هو انهم يحثوا recommend استخدام اللولب كوسيلة لتنظيم الاسرة وانهم يوعوا الست بمخاطر الهرمونات فى باقى الوسائل (الاقراص المركبة - حبوب الرضاعة - الحقن الشهرية - الكبسولات تحت الجلد) وان اللولب مافيهوش هرمونات فمببعمش مشاكل زى باقى الوسائل التانية... كمان الرائدات الريفيات مهمتهم الاساسية هى التوعية بوسائل تنظيم الاسرة والوصول لنسبة تغطية اعلى من ٨٠% فى استخدام اللولب

أولا بقا ايه هي مميزات اللولب... الى حضرتك هتقولها للسيدات علشان تقنعهم بيه

- ١) وسيلة بتتخط مرة واحدة وتبعد ١٢ سنين، يعنى مش كل شوية هتتعدى تفكرى انت خدت الحباية النهاردة ولا لا
- ٢) مافيهاش هرمونات فميتأثرش معايا على اى حاجة فى الجسم يعنى لايتخن ولا بيخسس ولا بيعمل هشاشة عظام ولا لخبطة فى الدورة ولا الدورة بتنقطع معاه، عايشة حياتك براحتك وكانك مابتخاديش اى حاجة لمنع الحمل
- ٣) بمجرد ماتشيليه تقدرى تحملي على طول من تانى يوم
- ٤) بينفع لى بترضع والكبيرة فى السن ومريضة الضغط والسكر والقلب والكبد، مافيش مرض معين بيمنع تركيبه

عيوب اللولب... الى طبعا حضرتك مش هتقولها للسيدات الى جاية تركيبه (احنا فاضلنا ٢٠%)

- ١) بيزود الدورة، يعنى بيخلي الدورة تيجي ثقيله وعدد ايام اكثر، كمان ممكن يعمل وجع مع الدورة
- ٢) ممكن يحصل عليه التهابات لو حضرتك مابتتضفيش نفسك كويس ويعملك التهابات فى الحوض

أيه هي موانع استخدام اللولب "الى حضرتك لو لقيتها هتقولها دورى على وسيلة تانية" ← طبعا دول مابيتسألوش

- ١) عندك مشاكل فى الرحم او عيوب خلقية فى الرحم، زى مثلا الدكتور قالك ان الرحم راجع لورا او جاي بالجانب او مقسوم نصين او ورم ليفى على الرحم
- ٢) جالك قبل كدة التهابات فى الحوض او التهابات فى المبيض والانابيب، او انسداد فى الانابيب

أمتى اركب اللولب:-

الاول لازم تتأكد انها مش حامل: ياما تطلبها pregnancy test فى البول ولو طلع سلبى تركيبوها، ياما تسألها عن اخر دورة جاتلها امتى ← بمجرد ماتشطف منها تيجي تركيب على طول وقدامها لحد ١٢ يوم من اول يوم من بداية نزول الدورة

لو جاتلك بعد ١٢ يوم اعملها pregnancy test طلع سلبى < ممكن تركيب

طب لو هيا لسة مخلفة < بتستنى لحد ٤ اسابيع بعد الولادة وتركب اللولب

طب لو هيا بترضع وبقالها اكثر من ٤ اسابيع بعد الولادة، وهى بترضع نضيف يعنى ماجتلهاش الدورة ← لو هي exclusive breast feeding يعنى رضاعة طبيعية فقط ٢٤ ساعة وهى لسة فى اول ٦ شهور ← ممكن تركيبها على طول او تطلبها pregnancy test لو طلع سلبى ركبها على طول

لو هية بترضع ووالدة بقالها اكثر من ٤ اسابيع بس الدورة بدنث ترجعها او الام بتستخدم لبن تانى مع الرضاعة الطبيعية: اعملها اختبار حمل طلع سلبى ركبها اللولب

طب لو هيا كانت بتستعمل وسيلة تانية لمنع الحمل:-

- ١- الاقراص المركبة: بتستنى لحد ٧ ايام الى فيهم withdrawal bleeding وبعدها فى اليوم ٥ الى ١٢ من إيقاف الاقراص ممكن تركيب اللولب، لو موقفة الاقراص بقالها اكثر من ١٢ يوم اعملها اختبار حمل فى البول طلع سلبى ممكن تركيبها
- ٢- اقراص الرضاعة: بعد التوقف عن استخدامها مباشرة، او فى فترة اقل من ٧ ايام، لو اكثر من ٧ ايام تعملها اختبار الحمل لو طلع سلبى ركبها اللولب
- ٣- حقن الـ ٣ شهور والحقن الشهرية كل شهر، فى ميعاد استخدام الحقنة او قبل ميعادها او بعد ميعادها باقل من ٧ ايام، او لو اكثر من سبع ايام تعملها اختبار للحمل طلع سلبى ركبها اللولب
- ٤- الكبسولة تحت الجلد **Implanon**: بمجرد زالة الكبسولة، او بعد ازالته بـ ٧ ايام، لو اكثر من ٧ ايام، اعملها اختبار حمل فى البول طلع سلبى ركبها اللولب

لو هيا مابتستعملش وسيلة والدورة متلخبطة، ملهاش ميعاد معين، بتقطع شهرين ثلاثة وترجع تانى ← اعملها اختبار للحمل طلع سلبى ركبها اللولب

لو هي بتستعمل وسيلة بس الدورة ملخبطة عليها ← اعملها الاول اختبار للحمل طلع سلبى < ركبها اللولب

لو هي مسقطه abortion: تركيب اللولب بعد ٤ اسابيع من السقط بشرط ان اختبار الحمل يكون سلبى

لو جوزها كان مسافر برة وجاء فجأة ← بيستخدم فى خلال اول ٥ ايام، لو اكثر من ٥ ايام بتستخدم وسيلة تانية لحد مالدورة تجيلها وبعدين تستخدم اللولب

طب ازاي بنركب اللولب

الأول بتعمل فحص للسنت بتشوف عندها اى recent genital infection زى

- ❖ قرح او حبوب على vulva & external genitalia
- ❖ افرازات cervical discharge
- ❖ وجع فى adnexal Tenderness / rebound
- ❖ وجع مع تحريك عنق الرحم cervical motion tenderness

بعد كدة بتركب IUD زى ما هتتعلم فى دورة تنظيم الاسرة

اهم حته بقاء، وهى دى اللي العيانة هتجيك عيادة النساء وهى المشاكل مع وسائل تنظيم الاسرة

طبعا اللولب ده foreign body فزى اى جسم غريب يدخل جسم الانسان يعمل معايا مشاكل كتيرة

ملحوظة صغيرة: احنا بنستخدم فى مصر اللولب النحاسى Copper bearing IUCD الى هو Copper T 380A لازم تتأكد من رقم ٣٨٠ على اللولب الى هو كمية النحاس الى على اللولب

بالنسبة فى حاجة اسمها Multi-load Cu 375 ده بيستخدم لو العيانة عايزة تركب لولب بس بيقع منها، اللولب ده بيبقى مشرشر علشان يمस्क فى الرحم، بس ده بيعمل more bleeding و more cramping واصعب لما تيجى تشيله، ماحدش بيستعمله دلوقتى

### مشاكل اللولب IUD Complication

الدورة بتيجى ثقيلة وكثيرة وطويلة menorrhagia، ومعها وجع dysmenorrhea

اولا هطمن الست بس بعد ماتعملها examination

General examination:-

Look: for assessing degree of anemia (pallor)

- BP: if  $[\geq 160/90]$  → HTN → control using anti-hypertensive medications
- If  $[< 100/60]$  → hypotension → shock → Anti-shock measures
- Pulse:  $[>100]$  = anti-shock measures
- Temp :  $[\geq 38^{\circ}\text{C}]$  = fever → a sign of PID

Local examination:

- Lower abdominal tenderness / rebound → PID
- Palpable liver / spleen → Hepato-splenomegaly → Hepatic patient
- Congested neck veins / Palpable liver / LL edema /  $\pm$  bronchial rales → congestive heart failure
- Petecheia & ecchymosis → problem with hemostasis

Local pelvic examination:

- Adnexal tenderness → PID
- Cervical motion tenderness → PID
- Cusco speculum: if thread not seen → exclude perforation (U/S + X-ray)
- If cervical purulent discharge → PID

لو بعد examination لقيت كل حاجة طبيعية، طمنها وقولها ان ده عادى مع اللولب وان الدورة الثقيلة دى هتقل مع الوقت وترجع لطبيعتها بعد فترة من الاستخدام

بس هتكتبلها روشتة لتقليل النزيف

- ✖ قرص كل ٨ ساعات حتى توقف النزيف **Pongstan-Forte** 500 tablet 1x3x5
- ✖ قرصين ٣ مرات يوميا حتى توقف النزيف **Kapron** 500 tablet 2x3x5
- ✖ قرص ٣ مرات يوميا حتى توقف النزيف **Dicynone** 250 tablet 1x3x5
- ✖ قرص ٣ مرات يوميا حتى توقف النزيف **Daflon** 500 tablet 1x3x5
- ✖ قرص ٣ مرات يوميا حتى توقف النزيف **Ruta-C** tablet 1x3x5
- ✖ كبسولة مرة واحدة يوميا بعد الغداء لمدة ٣ شهور بلا انقطاع **Haemoton** caps 1x1x90

لو الموضوع breakthrough bleeding يعنى تنقيط فى غير ميعاد الدورة، الاول اتأكد انه مش حمل pregnancy test negative بعدها اكتب للعيانة على الروشتة الى فوق

لو الموضوع قلب بانقطاع فى الدورة amenorrhea او الدورة تأخرت ← تعمل اختبار حمل ← طلع سلبى طمنها، طلع ايجابى هنتكلم عليه كمان شوية

المشكلة الثانية:-

### العيانة مش حاسة الفتل missed threads

أول حاجة افحص العيانة Cusco examination ← لو لقيت الفتل threads طمن العيانة، وأسألها هى هى عابزة تشيل اللولب ولا تسبيه مكانه

لو انت ملاقيتش الفتل بالـCusco ← اعمل للعيانة اختبار حمل ← طلع (+) ايجابى هنتكلم عليه كمان شوية

لو اختبار الحمل طلع سلبى ← أعمل للعيانة Pelvic US و Abdominal X-Ray lateral view

ياما مش هتلاقى IUD ← وده خلاص معناه ان اللولب نزل مع الدورة والعيانة ماخدتش بالها

ياما هتلاقى IUD جوه الرحم Intrauterine ← هتشلها بالـcrocodile ودى محتاجة Specialist

ياما هتلاقى IUD بره الرحم extra-uterine ← وده هتفتح وتجييه لانه medicated with copper ☹

### حملت على اللولب Pregnancy with IUD

الاول لاي سبب مثلا الدورة اخرتها، الدورة جاتلها فى ميعاد غير ميعادها، هى مش حاسة الفتل، كل الحاجات دى عملت اختبار حمل وطلع ايجابى اول حاجة ببص عليها بالسونار

عندى ٣ احتمالات

الاول هلاقى الحمل فوق واللولب تحت: ده بقول للعيانة انت حملت على اللولب لو سحبت اللولب احتمال السقط ٢٥% ولو سببت اللولب فى مكانه احتمال انك تسقطى لوحده ٥٠%

لو لقيت الحمل تحت اللولب (الحمل تحت واللولب فوق): بقول للعيانة احتمال انك تسقطى لو شيلتى اللولب زى احتمال انك تسقطى لوحده ٥٠% بس نتيجة الحركة ودخول الالات فى الرحم احتمال السقط بيبقى اعلى فاحنا هنسبيه، وماتخافيش اللولب لايبلزق فى المشيمة ولا هيخنق العيل ولا الكلام ده، العيل بيبقى محمى فى كيس المية لوحده واللولب بره لوحده

الثالث انى مش هلاقى حمل no gestational sac ← دى بقا مشكلة المشاكل ليه علشان رعب النسا Ectopic حمل خارج الرحم

هعمل للحالة عد كمي quantitative  $\beta$ -HCG فى الدم وده حاجة من ٢

أقل من ١٨٠٠ (وبعض الكتب ٢٠٠٠) ← ده هعيد التحليل بعد يومين لو طلع أقل من Double او اكبر من ٢٠٠٠ ولكن لا يوجد  
 intrauterine sac ده not-disturbed ectopic ← بحولها لاختصاصى علشان medical treatment الى هو methotrexate  
 لو أعلى من ١٨٠٠ (وبعض الكتب بتقول ٢٠٠٠) ← ده not-disturbed ectopic ← بحولها لاختصاصى علشان medical  
 treatment  
 ممكن من الأول الاقى extra-uterine gestational sac وفى الحالة دى ← ده definite un-disturbed ectopic تحول لاختصاصى  
 علشان medical treatment

### عيانة جاية بوجع شديد تحت منها Sudden severe lower abdominal pain

معاه نزيف او تنقيط او مش شرط

أول حاجة بعملها للعيانة هو انى ابص على vitals

- ❖ BP: [ $<100/60$ ] => Shock → Anti-shock measures (2 green cannula + IV fluids "colloid / crystalloids" ± Analgesia for pain "preferred opiates")
- ❖ Pulse: [ $>100$ ] = Shock → Anti-shock measures as above

بعد كدة بسأل العيانة، غالبا العيانة هتقولك انها لسة مركبة اللولب قريب، او الدورة مأخراها وهى مركبة اللولب او بينزل عليها تنقيط  
 ودلوقتى وجع شديد تحت منها

اول حاجة هعملها للعيانة هو baby check طلع (+) بكم فى سكة pregnancy with IUD بس خلى بالك ان لو فيه free fluid فى  
 Cull du sac ده disturbed ectopic وفى الحالة دى الحالة بتتحول طوارئ النساء ولازم تطلع عمليات فوراً

لو baby check طلع (+) وفيه intra-uterine gestation ده incomplete abortion ودى محتاجة برده تطلع عمليات النساء  
 علشان يتعملها تنظيف D&C

لو baby check طلع سلبى (-) دى بتعتبرها perforation بعمل للعيانة Pelvic US + Abdominal X-ray وبشوف مكان اللولب لو  
 طلع بره الرحم ← دى تطلع طوارئ النساء علشان تنفتح ويطلعوا اللولب

طب لو baby check طلع سلبى (-) واللولب جوة الرحم ← Intra-uterine دور على سبب تانى لهذا الوجع زى ovarian cyst او  
 appendicitis

### الست جالها سخونية مع افرازات من تحت وحرقان فى البول ووجع من تحت

دى حالة PID وبتأكد منها زى مابتعامل مع اى حالة Acute PID (راجع الفصل السابق Genital tract infection)، دى بحولها علشان  
 inpatient medical treatment ومتابعة بالسونار علشان لو حصل اى complication اقدر الحقها

السؤال بقا هل اسيب اللولب ولا اشيله وتستعمل وسيلة تانية

الراى الى موجود فى الكتب هو انك تسبب اللولب وتعالج الست عادى

الراى المصرى يقولك الستات المصرية بطبيعتها مش نظيفة "طبعا انا هتشتم فى الكلادة" فيقولك ان اغلب حالات PID بتظهر مع اللولب  
 فالاحسن تشيلها اللولب وهى تستعمل وسيلة تانية

### (٢) الاقراص المركبة COC

دى اكثر وسيلة بتستعمل فى امريكا واوروبا والدول المتقدمة (فى امريكا ٦٥% من وسائل منع الحمل هى الاقراص المركبة)

طبعا دى اكثر وسيلة فعالة بس مش مع الست المصرية الى بتتنسى هى طبخت ايه؟

طبعا علشان هى اكثر وسيلة بتستعمل فهى اكثر وسيلة تم دراسة مشاكلها

## الأول طبعا لو الست اختارت الاقراص المركبة ايه هيا المميزات بتاعتها

- ١) انت الى بتاخدوها بنفسك مش محتاجة تيجى لحد يركبها لك وحد يشيلها لك
- ٢) بتنظم الدورة، وبالتالي يتمنع حدوث تكيسات على المبيض وخلافه
- ٣) ملهاش سن معين، ممكن الصغيرة او الكبيرة تستعملها بانتظام
- ٤) مبتأثرش على العلاقة الزوجية
- ٥) بتقلل فرصة حدوث سرطان الرحم او المبيض (فال الله ولا فالك، تف من بقك يادكتور.....ماحدش يقول العبارة دى)

ايه بقا العيوب ⇨ دى هنقولها مع المشاكل الى بتحصل مع COC

## ايه هي موانع استخدام الاقراص المركبة؟ اللي لو الست عندها حاجة منهم ممنوع تاخذ الاقراص؟

ملحوظة قبل مانتكلم، بالنسبة لـ GP أى حاجة من دول موجودة ممنوع تاخذ الاقراص المركبة، ممكن الاخصائى يكتبها فى الحالات اللي مش مكتوبة باللون الاحمر

- ١) المرضعات اذا كان عمر الطفل اقل من ٦ شهور ⊗
- ٢) ولدت بس مابترضعش، مر على ولادتها اقل من ٣ اسابيع ⊗
- ٣) تليف بالكبد liver cirrhosis ⊗
- ٤) ظهور الصفرا مع استخدام الاقراص المركبة jaundice ⊗
- ٥) ظهور الصفرا مع الحمل gestational cholestasis ⊗
- ٦) بتتعالج من المرارة "حصوات فى المرارة او التهاب مزمن فى المرارة" gallbladder stones ⊗
- ٧) جاتلها قبل كدة جلطة فى القلب "الشريان التاجى" - جلطة فى المخ - جلطة فى الشريان الرئوى ⊗
- ٨) جالها جلطة فى اوردة رجليها قبل كدة DVT ⊗
- ٩) جالها سرطان فى الثدي "سواء بتتعالج منه او تعالجت منه" breast cancer ⊗
- ١٠) بتتعالج من ارتفاع ضغط الدم (اعلى من ١٤٠/٩٠)
- ١١) جالها ضغط مع الحمل او تسمم الحمل pre-eclampsia / gestational hypertension
- ١٢) عندها السكر بقالها اكثر من ٢٠ سنة بتاخذ علاج للسكر Diabetic for > 20yrs
- ١٣) عندها السكر وجالها مشاكل نتيجة السكر زى مضاعفات بالشبيكة diabetic retinopathy - مضاعفات بالكلى diabetic nephropathy - التهابات بالاعصاب diabetic neuropathy - جلطات بالشرايين chronic limb ischemia / diabetic foot
- ١٤) عندك عوامل خطورة للاصابة بامراض الشريان التاجى والقلب (سن كبير اكبر من ٤٥ سنة - بتدخن - تخينة - عندها السكر - الضغط)
- ١٥) بتدخن وعمرها اكبر من ٣٥ سنة
- ١٦) ولدت ومابترضعش وبقالها اكثر من ٣ اسابيع بس عندها اى حاجة من الحاجات دى (ولدت قيصرى - نقلت دم اثناء او بعد الولادة - عندها سمنة "تخينة" - بتدخن) ⇨ دى تستنى لحد ٦ اسابيع بعد الولادة (بعد الاربعين)
- ١٧) بيجيها صداع نصفى بلا اعراض منذرة common migraine وعمرها اكبر من ٣٥ سنة
- ١٨) بيجيها صداع نصفى مع اعراض منذرة classic migraine فى اى سن
- ١٩) عمرها اقل من ٣٥ سنة والاقراص المركبة بتزود حدوث نوبات الصداع النصفى بلا اعراض منذرة
- ٢٠) المريضات الى بيتعالجوا من الصرع epilepsy او بيستخدموا ادوية الصرع الى هيا:-

فينيتوين [بينتوين]

كاربامازيبين [تيجريبتول - تيجرال - نيوروتوب]

توبريمات [توباماكس - توبريمات]

اوكساكاربازيبين [تريپتال]

فينوباربيتون [سومنايتا]

لاموتريجين [لاميكثال]

٢١) عنها نزيف مهبلى لم يشخص سببه

٢٢) عندها انقطاع فى الدورة amenorrhea ولم يشخص سببها

بعد ماسألت العيانة على كل الاسئلة الرهيبة دى، بس بيحدد هل العيانة تاخذ الاقراص ولا لا

بعد كدة الفحص الوحيد الى المفروض اعمله هو قياس الضغط ← لو طلع اكبر من ١٤٠/٩٠ بقول للعيانة تستنى وماتأخذش الاقراص وتابع الضغط بتاعها لمدة اسبوع يوم اى ويوم لأ وتجيبك القرايات بعد اسبوع، لو طلع عندها ضغط خلاص باكتب علاج للحالة او احولها لاختصاصى واكتبها على اى وسيلة تانية غير "الحقن الشهرية والاقراص المركبة"

### أمتى العيانة تبدأ تأخذ الاقراص:-

لو العيانة مابتستعملش اى وسيلة والدورة بتجيلها منتظمة: بتستنى لحد اول يوم فى الدورة "اول يوم الدورة بدئت تنزل وتبدأ تأخذ الاقراص" فيه طريقتين تانيين: الطريقة الاولى: انك تستنى لحد ٥ يوم فى الدورة، دى طريقة مصرية علشان تتأكد ان ده دم دورة مش حاجة تانية

الطريقة الامريكية: الست بتستنى لحد اول يوم احد Sunday من بداية الدورة، ليه؟ علشان كل الاقراص المركبة اول قرص فى الشريط مكتوب عليه يوم الاحد، فالست تبدأ تأخذ الاقراص بترتيب ايام الاسبوع فمتنساش انها ماتأخذش القرص، بس الطريقة دى محتاجة عازل او وسيلة مؤقتة لمنع الحمل زى الواقى الذكرى - مبيدات الحيوانات المنوية

لو العيانة لسة والدة طبيعى ومابتترضعش: فى الاسبوع الرابع بعد الولادة (من اليوم ٢١ - ٢٨ يوم)، لو بعد كدة بيتستنى لحد نزول الدورة لو العيانة ولدت قيصرى او حصلها اى مشاكل مع الولادة "نزيف - نقل دم": بعد الاربعين "النفاس" ومابتترضعش او بترضع طبيعى + صناعى: بعد ٦ اسابيع بالظبط بعد الولادة (بعد الاربعين)، لوبقالها اكثر من ٦ اسابيع (٤٢ يوم) لو الدورة بدئت تجيلها تعامل معاملة الست الى ماتأخذش وسيلة، لو الدورة ماجاتلهاش تعمل اختبار حمل لو طلع سلبي تبدأ تأخذ الاقراص و فى اول ٧ ايام تستعمل وسيلة وقاية اخرى (منع الجماع - الواقى الذكرى - مبيدات الحيوانات المنوية)

لو العيانة بترضع نصيف - مابيجلهاش الدورة - والرضاعة الطبيعية حصرية ١٠٠% بترضع طبيعى فقط ولا تستعمل اى وسيلة: بعد ٦ شهور من الولادة (مع اول الشهر السادس يعنى الطفل يجى يتطعم وهى تبدأ تأخذ الاقراص) او بمجرد انها بدئت تاكل الطفل، تديله اى حاجة تانية مع اللبن، او لو الدورة بدئت ترجعلها تبدأ تأخذ الاقراص بمجرد نزول الدورة فى اول ٥ ايام

لو العيانة بتستعمل وسيلة تانية لتنظيم الاسرة وعازية تغير الوسيلة

- ❖ اللولب: بمجرد ماتشيل اللولب تبدأ تستعمل الاقراص المركبة
- ❖ حبوب الرضاعة POP: اول مابتوقفها على طول، لو وقفها بقالها اكثر من ٥ ايام، تستنى لحد مالدورة الجاية
- ❖ الحقن الشهرية: فى ميعاد الحقنة القادمة او بعدها فى خلال اسبوع، لو اكثر من اسبوع تستنى لحد نزول الدورة الجاية

دلوقتى بقا هنتكلم عن

### مشاكل الاقراص المركبة COC complications

#### رقم ١ واهم شكوى، العيانة تعمل ايه لو نسيت الاقراص

لو نسيت قرص واحد او قرصين (١) فقط ← تأخذ القرص الى نسيته اول ماتفتكر، وتكمل باقى الشريط عادى، حتى انها ممكن تأخذ القرصين (القرص الى نسيته وقرص النهاردة مع بعض) مافيش مشاكل

لو نسيت ٣ اقراص او اكثر (3 ↑) ← بتأخذ آخر قرص نسيته وباقى الاقراص الى نسيته بترميها

بتستخدم وسيلة وقاية اخرى لمنع الحمل لمدة ٧ ايام زى الواقى الذكرى - منع الجماع - مبيدات الحيوانات المنوية

لو حصل جماع فى خلال الـ ٥ ايام الماضية بتستخدم وسيلة منع الحمل الاضرائية "Contraplan II 1x2"

بعد كدة لو الاقراص دى كانت فى اول ١٤ قرص (باقى فى الشريط اكثر من ٧ اقراص بتكمل الشريط عادى وتأخدى راحة ٧ ايام عادى)

لو الاقراص دى كانت فى اخر ٧ اقراص (باقى فى الشريط اقل من ٧ اقراص) بتكمل الشريط وتبدئ شريط جديد بدون راحة بين الشريطين

لو الست بتنسى كتير اكتبها على طريقة تفتكر بيها اخذ الاقراص، زى مثلا تحطها على الكوميديناو جنب السرير قبل ماتنام او اول ماتصحى من النوم تأخذها، ممكن تحطها فى درج التلاجة بس على الوش بحيث انها اول ماتفتح التلاجة تفتكر تأخذها، ممكن تفكر نفسها بحاجة معينة هى بتعملها بانتظام زى مثلا انها تأخذ الاقراص مع وجبة معينة الفطار او الغدا او العشاء، او مع حاجة معينة زى الصلاة، او مع عادة معينة زى مثلا هى متعودة تروق الحمام العصر كل يوم تفكر نفسها انها تأخذ القرص قبل ماتروق الحمام او اول مارتجع من الشغل وهى بتشتغل، ودلوقتى زمن الكمبيوتر و الموبايلات ممكن تكتب ملف على الكمبيوتر يفكرها انها تأخذ القرص اول ماتفتح

الكمبيوتر، او ممكن تنزل برنامج على الموبايل زى برنامج الاذان علشان ينبهها انها تاخذ القرص فى وقت معين، او ممكن تكتب ورقة فى المطبخ تفكرها بانها تاخذ الاقراص بتاعة منع الحمل

لو بعد ده كله لسة بتسنى وبتتلخبط "دى ماتبقاش ست امال بتجيب حاجات البيت من السوق ازاي" حولها على وسيلة تانية لاحتياج الى تذكير يومى زى حقن الـ ٣ شهور ، كبسولات امبلانون تحت الجلد كل ٣ سنوات او اللولب النحاسى كل ١٢ سنة

### نزيف غير منتظم "تنقيط فى وسط الدورة"

الأول بتسال العيانة، هل بتاخذ الاقراص بانتظام كل يوم ولا كل شوية بتتنسى والشريط يخلص فى شهرين،

لو العيانة منتظمة فى أخذ الاقراص طمنها وقلها ان "ده عادى والدم ده هيختفى مع استمرار استعمال الاقراص بانتظام، بس مش عايزك تلخبطى وتنسى وماتخافيش الدم ده مافيش منه اى مشاكل"

لو العيانة مش منتظمة فى أخذ الاقراص بتعملها اختبار حمل baby check ولو طلع ايجابى (+) خلاص ده bleeding in early pregnancy

بعد كدة بتتعامل مع الحالة زى اى حالة abnormal vaginal bleeding، لو لقيت سبب عالجه او حولها على حسب ماتقضى الحالة

لو لا يوجد اى سبب سوى بدء استعمال الاقراص المركبة

الاول بكتبلها رويشة علاج علشان توقف النزيف الى هيا

✖ قرص كل ٨ ساعات حتى توقف النزيف 800 **Ponstan-Forte / Brufen-Retard**

✖ قرصين كل ٨ ساعات حتى توقف النزيف 500 **Kapron / Cyclokapron**

✖ قرص كل ٨ ساعات حتى توقف النزيف 250 **Dicynone / Haemostop**

✖ قرص كل ٨ ساعات حتى توقف النزيف 500 **Dafon / Dafrex**

لو النزيف فضل موجود (بعد ٥ ايام من العلاج) بتمشى على حاجة من ٢ بشرط عدم وجود سبب يمكن علاجه

١ ➔ بخليها تاخذ اقراص منع الحمل المركبة قرصين (٢) بدل قرص واحد فى اليوم لمدة اسبوع وبعدين تكمل قرص مرة واحدة فى اليوم لمدة ٢١ يوم ثم راحة لمدة ٧ ايام ثم تبدأ عادى شريط جديد قرص مرة واحدة فى اليوم

٢ ➔ او اخليها تاخذ الاقراص عادى قرص مرة واحدة فى اليوم وازود عليها اقراص **Premarin 0.625 tab** قرص مرة واحدة فى اليوم لمدة اسبوعين (١٤ يوم) وبعدها تكمل باقراص منع الحمل لوحدها مرة واحدة فى اليوم لمدة اسبوع (٧ ايام) كدة المجموع ٢١ يوم ثم تاخذ راحة لمدة ٧ ايام ... ثم تبدأ اقراص منع الحمل عادى ٢١ و ٧

لو الموضوع تكرر كذا مرة (اكثر من ٣ دورات - ٣ شرايط) بغيرلها نوعية اقراص منع الحمل

هنا بقا نتكلم شوية عن اقراص منع الحمل وتركيباتها

النوع الى الستات اغلبها بيستخدمه هى الاقراص بتاعة وزارة الصحة المصرية ميكروسيبت **Microcept** الى هو الشريط بـ ٧ قرش ده تركيبته عبارة عن (Ethinyl-Estradiol 30µg + Levonorgestrel 150µg) الليفونورجستريل ده 2<sup>nd</sup> Generation progestin فلو انت عايز تغير الاقراص علشان النزيف وسط الدورة بغيرها بحاجة فيها

كمية Ethinyl-Estradiol كبيرة شوية زى **Cilest** دى فيها 35µg بدل 30µg (الخمسة ميكروجرام دول يفرقوا كثير مع النزيف)

او نوعية فيها 3<sup>rd</sup> generation progestin زى برده **Cilest** فيها Norgestimate 0.25mg

الى احسن منه شوية هو **Gynera** ده عبارة عن (EE 30µg + Gestodene 75µg) ده الشريط بـ ١٧ جنية

احسن تركيبة فى السوق هي ياسمين **Yasmin** ودى تركيبته (EE 30µg + Drospirenone 3mg) بس دى اغلى حاجة بـ ٤٠ جنية يعنى لو هنكتبهم فى جدول

Name	Estrogen base	Progestin base	Price
Microcept	Ethinyl-Estradiol 30µ	Levonorgestrel 0.15	1
Cilest ☺	Ethinyl-Estradiol 35µ	Norgestimate 0.25	15
Marvelon ☺	Ethinyl-Estradiol 30µ	Desogestrel 0.15	15
Gynera ☺	Ethinyl-Estradiol 30µ	Gestodene 0.075	17
Yasmin ☺	Ethinyl-Estradiol 30µ	Drospirenone 3mg	٤٠



يجرب النوعية الجديدة لحد ٣ دورات 3 cycles لو لسة النزيف موجود بغير على نوعية تانية

ملحوظة لو النزيف فضل موجود او ظهر بعد استعمال الاقراص لمدة ٣ شهور كدة النزيف مش بسبب الاقراص ولازم ادور على سبب تانى عضوى ليه

### انقطاع الدورة الشهرية (عدم نزول دم الحيض الشهري) amenorrhea

الأول اتأكد ان العيانة بتأخذ الاقراص بانتظام كل يوم، ومابتتناسش الاقراص

ثانيا اتأكد ان العيانة بتسبب ٧ ايام راحة بعد ماتخلص الشريط

لو الاتنين الى فوق ماشيين كويس (بتأخذ الاقراص قرص مرة واحدة لمدة ٢١ يوم وراحة لمدة اسبوع) او لقيتها بتلخبط فى الاقراص وبتنسى على طول -> اعملها اختبار حمل < baby check لو طلع ايجابى (+) الف مبروك يامدام ووقفى استعمال الاقراص خالص علشان مانضرش الجنين "الببى" والعيل ده رزق وربنا هو الى بيرزق

لو طلع سلبى طمنها وقولها ان ده شيء عادى وهو مش شرط ينزلها دم الدورة الشهرية period كل شهر بس تكمل استعمال الشريط لمدة ٢١ يوم وتريح ٧ ايام ولو المشكلة اكررت ترجعلك تانى الشهر الجاى

لو طلعت مابتريحش ٧ ايام (كل الشرايط فى مصر ٢١ قرص مافيش عندنا شريط ٢٨ قرص) فاهمها انها لازم تريح ٧ ايام علشان ينزل عليها الدورة والشريط الجديد تكمله عادى وبعدين تريح ٧ ايام وتبدأ شريط جديد

لو الموضوع اكرر عليها الشهر التانى وبرده اتأكدت ان العيانة ماشية كويس (٢١ + ٧) اعملها تانى اختبار للحمل < زى الى فوق لو طلع سلبى طمنها وقولها تجيلك الشهر الجاى لو الموضوع فضل موجود

لو الموضوع فضل موجود لحد ٣ دورات amenorrhea for 3 months واختبار الحمل كل مرة يطلع سلبى < خليها توقف اقراص منع الحمل خالص وحولها لاختصاصى او استشارى يعرف سبب 2ry amenorrhea الى عندها

### الصداع headache

احنا قولنا من الاول لو المنتفعة الست عندها صداع نصفى كلاسيكى، الى هو ببيظهر قبله اعراض منذرة زى ومضات / هالات ضوئية / خطوط ملونة / كتمة فى الصوت classic migraine with aura دى ممنوع تاخذ اقراص منع الحمل المركبة

لو الست ببجيلها صداع نصفى شائع الى هو صداع على ناحية واحدة من الراس بيبستمر لدقائق او ساعات على شكل نبضات / خبط / ترقيع وبيزيد مع الصوت العالى / الضوء العالى / الضوضاء وممكن معاه غثيان او قىء ويتكرر اكثر من مرة على مدار العمر ولكن لايسبقه اعراض منذرة common migraine without aura دى لاتستعمل الاقراص المركبة فى حالتين، لو عمرها اكبر من ٣٥ سنة او لو نوبات الصداع النصفى بدئت تظهر اكثر مع استعمال الاقراص المركبة

الى فاضلنا بقى هو الصداع العادى Tension headache...

الأول لازم نفهم هى اقراص منع الحمل المركبة العادية بتعمل صداع ازاي < هى بتعمل عندى ٣ اشكال من الصداع ١- بتزود حدوث نوبات الصداع النصفى common migraine عن طريق estrogen فلهاذا لو الاقراص زودت نوبات الصداع

النصفى علاجها اوقف الاقراص المركبة وادور على وسيلة اخرى غير هرمونية (اللولب النحاسي)

٢- بتعمل salt and water retention فيبزود الضغط BP ↑ ودى هنتكلم عنها كمان شوية

٣- امكنها بتعمل معايا Na & H<sub>2</sub>O retention فيبتعمل معايا tension headache

لو عملت معايا tension headache صداع عادى نتيجة Na & H<sub>2</sub>O retention من غير ماترفع الضغط HTN فى الحالة دى: اولاً بستثنى اى سبب آخر عضوى / نفسي يكون هو السبب فى الصداع زى التهاب الجيوب الانفية - الانيميا - السكر - عيوب الابصار... الخ

لو لا يوجد اى سبب آخر غير البدء فى استخدام اقراص منع الحمل المركبة؛ يعنى الصداع حصل فى اول ٣ شهور من بداية استعمال الاقراص..... بكتب للعيانة على العلاج ده مع التعليمات

✍ قرص كل ٨ ساعات حتى توقف الصداع **Brufen 400 tablet**

✍ قرصين كل ٨ ساعات عند اللزوم **Paracetamol 500** او

✍ + الاقلال من تناول الملح والبعد عن الموالح والمخللات

✍ + الاكثار من شرب الشاى والقهوة

لو فضل الموضوع مستمر اكثر من دورتين "شهرين" حول العيانة على نوع اقراص فيها EE اقل ونوع احسن فى progestin base

زى *Gynera / Yasmin*

لو الموضوع فضل مستمر بعد تغيير الاقراص، او ظهر بعد ٣ شهور من بدء استخدام الاقراص، دور على سبب تانى او حول الحالة لاختصاصى نفسية وعصبية لمعرفة السبب

ملحوظة: لو الصداع بيظهر فى الـ ٧ ايام راحة الى العيانة بتوقف فيهم الاقراص ويرجع يخف مع استعمال الاقراص بنحول العيانة على حاجة اسمها الاستخدام المطول او الاستخدام المستمر لاقراص منع الحمل المركبة

الاستخدام المطول extended use (٧ + ٨٤): الست تبدأ تأخذ ٤ شرايط اقراص مركبة بلا انقطاع يعنى (٢١ + ٢١ + ٢١ + ٢١) يعنى ماتريحش ٧ ايام بين الشرايط وبعضها وبعد ماتخلص ٤ شرايط تريخ ٧ ايام وتبدأ من جديد تانى (٢١ + ٢١ + ٢١ + ٢١) يعنى هى هتريخ ٤ مرات بس فى السنة، علشان كدة بعض الاختصاصيين بيقلو عليها الطريقة الموسمية seasonal use

الاستخدام المستمر (٢١ + ٢١ + ٢١ + ..... مالانهاية): الست تبدأ تأخذ شرايط منع الحمل بلا انقطاع، بدون راحة ٧ ايام بين الشرايط تخلص شريط تخش فى الى بعده على طول، الطريقة دى لها مميزات كثيرة واغلب الامريكيات بدنوا يستعملوها ومن اهم المميزات دى better compliance يعنى مش هتقعد تعد كل شهر عدى ٧ ايام ولا لأ وخاصة ان اللخبطة بتظهر مع اول ايام فى استعمال الشريط، ثانيا بتريحهم من لبس الفوط الصحية always او التامبون tampon فبالتالى الست تلبس الى هي عايزاه فى اى وقت بدون قلق وتروح الشغل كل يوم باستمرار وتلبس البكىنى فى اى وقت براحتها وتهيص يعنى، كمان لقوا الطريقة دى بتقل حدوث الانيميا فى الستات علشان مافيش عندى monthly bleed الى هو اهم سبب للانيميا فى الستات، وكمان بتريحهم من اعراض ما قبل الدورة pre-menstrual syndrome الى هي صداع ووجع فى صدرها وشوية اسهال او ترجيع، كمان لقوا الستات دول اقل عرضة فى حدوث هشاشة العظام بعد سن اليأس

عييها بقا: اولاً بتعمل artificial amenorrhea يعنى الست مابيجلهاش دورة خالص وبالتالي بعض الستات يحسوا انهم عجزوا بدرى وزيه زى الستات الى فى سن اليأس مالهومش لازمة يعنى عامل نفسي فاعلب الستات الشرقيات عامة مابيجبوش الحكاية دى، ثانيا بتبقى شوية costly على الست يعنى هيا بدل مابتستعمل ١٣ شريط فى السنة هتستعمل ١٧ شريط، اهم عيوب بقا والى بتخلى الدكاترة نفسها ماتنصحن بهذا الاستخدام لكل الستات اولاً ان الست دى لو حملت got pregnant على الاقراص مش هنعرف الا بعد فوات الاوان تكون بطنها بدئت تكبر او ظهر عليها اعراض بداية الحمل (غثيان وقىء صباحى - وجع فى الثدي - غممان نفس والبعد عن الطعام - زيادة عدد مرات التبول - زيادة الحساسية للروائح) او لو بدء ينزل عليها نزيف bleeding in early pregnancy ايا كان سببه، او المصيبة الاكبر لو جالها مرض بيعمل amenorrhea هى مش هتتعرف وهنتأخر فى تشخيص المرض.... المشكلة الثانية هو زيادة الاعراض الجانبية للهرمونات الى هيا (زيادة الوزن - ارتفاع الضغط الدموى - زيادة حدوث جلطات بالاوردة والشرابين - زيادة طفيفة فى الاصابة بمرض سرطان الثدي)

### ظهور ارتفاع الضغط مع استعمال اقراص منع الحمل HTN

لو العيانة بتتعالج من ارتفاع الضغط او عندها تاريخ مرضى بارتفاع الضغط مع الحمل gestational HTN او تسمم الحمل pre-eclampsia ممنوع تأخذ اقراص منع الحمل المركبة

المفروض العيانة كل مرة لما تيجى تأخذ الشريط حضرتك تقيسها الضغط، فى اى مرة تقيسها الضغط لقيته اعلى من ٩٠/١٤٠

لو كان اعلى من ١٠٠/١٦٠ والعيانة completely resting يعنى قاعدة بقالها ٥ دقائق على الأقل، وماتكونش خدت حاجة بترفع الضغط زى شرب شاي كثير / قهوة / ادوية علاج البرد والانفلونزا - دى كدة خلاص HTN patient مريضة ضغط وعليها انها توقف استعمال اقراص منع الحمل المركبة وتستعمل وسيلة تانية

لو كان بين ٩٠/١٤٠ - ٩٩/١٥٩ دى تأخذ وسيلة مؤقتة لمنع الحمل لمدة ٥-٧ ايام (منع الجماع - واقي ذكري - مبيدات الحيوانات المنوية **Contracept vaginal pessary**) وتقيس الضغط بتاعها كل يومين مرة لمدة ٣ قياسات متتالية، لو قياسين اعلى من ٩٠/١٤٠ - دى خلاص مريضة ضغط، دى تحولها على وسيلة تانية غير الاقراص و تابع مع دكتور باطنة علشان تعالج الضغط

لو الضغط بتاعها فى القياسات الثلاثة طلع اقل من ٩٠/١٤٠ - دى تابع الضغط بتاعها باستمرار و اول مايبدا يطلع تانى توقف اقراص منع الحمل وتمشى على وسيلة تانية

① ملحوظة: لو العيانة ضغطها بين ٨٥/١٣٠ الى ٨٩/١٣٩ ⇨ ده بيسموه دلوقتى pre-hypertension ودى بتحتاج life style modification و salt restriction .... يعنى تلعب رياضة وتتحرك كلها حبتين وتقل الملح فى الاكل وتبعد عن المسبك وتنصحها تبطل اقراص منع الحمل المركبة لأن فيها هرمونات بتزود ارتفاع الضغط والافضل لو تستعمل وسيلة تانية

### غثيان او ترجيع (قيء) بعد تناول الاقراص

الأول زى اى حاجة تتظمن ان العيانة بتاخذ الاقراص بانتظام كل يوم، لانها لو بتلخبط ممكن يكون القيء ده بسبب الحمل مش الاقراص بتقولها على تعليمات علشان لو رجعت مع الاقراص:-

- ❖ بتاخذ الاقراص فى وسط الاكل او قبل النوم على طول
- ❖ لو رجعت على طول بعد ماخذت القرص، تاخذ قرص تانى علشان تضمن فعالية الاقراص
- ❖ لو الترجيع فضل موجود ممكن تكتبلها على ادوية ضد الترجيع تاخدها قبل ماتاخذ الاقراص زى قرص عند اللزوم **Primperan / Meclopram tablet**
- ❖ قرص عند اللزوم **Motilium / Motinorm / Gastromotil tab** او

لو الترجيع ده موجود على طول ملوش علاقة بتناول الاقراص او ظهر بعد فترة من استعمال الاقراص ⇨ يعامل معاملة الترجيع لاي سبب آخر

### الام بالثدى، تقل او وجع بالثدى

قد يصاحب تناول الاقراص ظهور الام بالثدى، لو العيانة بدء يجبلها وجع فى صدرها مع الاقراص، الاول تاكد من عدم وجود اى سبب عضوى تانى زى fibroadenosis او اى benign / malignant lesion فى الثدى وممكن تحتاج تعمل sono-mamography فى بعض الحالات

لو مالفيتش اى سبب reassurance طمن العيانة واكتبلها على اى مسكن زى **بروفين** ٤٠٠ قرص ٣ مرات يوميا عند اللزوم + تلبس حمالة ترفع صدرها و تكون من القطن + تعمل كمادات ماء دافية على صدرها

### زيادة فى الوزن

اغلب الوسائل الهرمونية بتزود الوزن نسبيا لكن مش بالدرجة الى هي، بس لو الست حست ان وزنها بيزيد مع الاقراص فهمها ان ده بسبب نمط التغذية "طريقة الأكل" الى الست بتاكل بيه وهى لازم تظبط اكلها علشان تخس، تزود الخضروات والفواكه وتقلل من المحشى بكل انواعه والطبخ "اللوبياء - الفاصوليا - البامية - الكوسة - البسلة" وتقلل من اللحوم وخاصة الملبسة والضاني ..... الخ

دى كدة المشاكل اللي ممكن تقابلك مع اقراص منع الحمل المركبة نيجي بقا للوسيلة الثالثة

### (٣) حبوب الرضاعة POP

دى بالنسبة ليا افشل طريقة مع الست المصرية وانا عن نفسي مابجهاش وبالنسبة لى الحقن الشهرية برقبتهها الاول زى اى وسيلة تنظيم اسرة، الست هتسألك عن مميزات وفوائد الوسيلة، ايه بقا مميزات حبوب الرضاعة؟

- (١) ممكن تستخدم فى الستات الى بترضع بامان يعنى مبيتأثرش على الرضاعة الطبيعية
- (٢) ملهاش سن معين ممكن الصغيرة او الكبيرة تستخدمها عادى
- (٣) لو الست مش هتقدر تستخدم الاقراص المركبة ممكن تمشى على حبوب الرضاعة فى بعض الحالات

بعد كدة طبعا الست هتسألك عن موانع استخدام حبوب الرضاعة؟

- (١) امراض الكبد زى تليف الكبد / التهاب فى الكبد
- (٢) جاتلك الصفراء قبل كدة (مع الحمل / مع استخدام اقراص منع الحمل)
- (٣) جاتلها جلطة قبل كدة فى اوردة الساق DVT واتحجزت فى قسم الجراحة
- (٤) جاتلها جلطة قبل كدة فى الشريان الرئوي PE ودخلت عناية مركزة
- (٥) جالها او بنتعالج من سرطان فى الثدى Breast cancer
- (٦) بتاخذ ادوية لعلاج الصرع زى

Phenytoin [**Epanutin**]

Carbamazepine [**Tegretol - Neurotop - Tegral**]

Oxycarbazine [**Trileptal**]

Phenobarbitone [**Sominaletta**]

Topiramate [**Topamax**]

- ٧) لو لسة بقالها اقل من ٦ اسابيع (٤٠ يوم) بعد الولادة وبترضع / او اقل من ٤ اسابيع ومابترضعش  
٨) الست الى بيجلها صداع نصفى مع اعراض منذرة classic migraine  
٩) لو الست ظهرت عليها اعراض (IHD - CAD) Ischemic heart disease مع استعمال حبوب الرضاعة

طب مين الست الى ماتقدرش تاخذ اقراص مركبة COC بس تقدر تاخذ حبوب الرضاعة POP؟

- ١) الست الى بترضع فى اول ٦ شهور breast feeding  
٢) الست الى بتشرب سجاير smoking  
٣) الست الى عندها الضغط  
٤) الى عندها صداع نصفى سواء صداع نصفى بدون اعراض منذرة common migraine سواء سنها اقل او اكبر من ٣٥ سنة  
٥) الليت الى بتتعالج من IHD وماشية على العلاج و controlled او risky for IHD

### أمتى الست تبدأ تاخذ حبوب الرضاعة؟

- ❖ لو الست والدة وبترضع طبيعي ١٠٠% exclusive breastfeeding: تبدأ تاخذها من آخر الاسبوع السادس (بعد الاربعين)
- ❖ لو الست والدة وبترضع جزئيا (رضاعة طبيعية + اى شيء آخر): تبدأ تاخذها بعد الاسبوع السادس (بعد الاربعين)، لو مر اكثر من ٦ اسابيع تاخذها واول يومين تاخذ وسيلة ثانية لمنع الحمل (منع الجماع - واقى ذكرى - **Contraseed** vaginal supp)
- ❖ لو الست والدة ومابترضعش: بعد مرور ٤ اسابيع (شهر) بعد الولادة
- ❖ لو الست بتجيلها الدورة (بترضع او بدون رضاعة): فى اول ٥ ايام من نزول دم الدورة
- ❖ لو مر اكثر من ٥ ايام على اول يوم فى نزول دم الدورة: تاخذ حبوب الرضاعة طالما انت متأكد انها مش حامل، اول يومين تاخذ وسيلة اخرى لمنع الحمل (واقى ذكرى - منع الجماع - **Contraseed** vaginal supp)، ممكن تاخذ اقراص منع الحمل الاضطرابية **Contraplan II** قرص كل ١٢ ساعة لو حصل جماع فى الايام الثلاثة الماضية
- ❖ لو الست لاتحيض او مر اكثر من ٦ شهور على الولادة والدورة لسة مارجعتش: تعملها الاول اختبار حمل ⇨ طلع سلبي تبدأ تستخدم الحبوب وتستعمل وسيلة ثانية لمنع الحمل فى اول يومين (واقى ذكرى - منع الجماع - **Contraseed** vaginal supp)
- ❖ لو الست هتشيل اللولب: بمجرد ماتشيل اللولب تبدأ تستخدم حبوب الرضاعة
- ❖ لو الست متحولة من وسيلة هرمونية ثانية (الاقراص المركبة - الحقن الشهرية - **Implanon**): بمجرد ايقاف اقراص منع الحمل المركبة، او بمجرد ايقاف الوسيلة الثانية طالما عملتها اختبار حمل baby check وطلع سلبي

### مشاكل حبوب الرضاعة

الأول لازم نفهم ايه هي حبوب الرضاعة علشان نفهم مشاكلها

بص ياسيدي وياستي؛ صليت بينا على النبي ﷺ، دي حبوب تركيبها انها موجود فيها progestin فقط بس بكمية قليلة جداً، اقل حتى من الى موجود فى الاقراص العادية COC، يعني رحمني من مشاكل متعددة الى هيا (الضغط و السكر وزيادة الوزن والصداع النصفي وغيرها) لكن نتيجة ان الهرمون ده موجود بنسبة قليلة فانا لازم احافظ على المستوى بتاعه فى الدم ثابت، فعشان كدة أهم حاجة هو "الست تأخذ حبوب الرضاعة كل يوم فى نفس الميعاد بالظبط بدون توقف" يعنى مافيش راحة طول ما هي بتستعملها،

النقطة الثانية ان بسبب الهرمون ده موجود بنسبة قليلة جداً فالأفضل لو بيستخدم فى الستات المرضعات breastfeeding باعتبار ان الرضاعة الطبيعية لوحدها وسيلة منع حمل طبيعية lactational amenorrhea method، فلما استخدمها مع حبوب الرضاعة بيزود efficacy لحبوب الرضاعة (من نسبة حدوث حمل "فشل الوسيلة" ٣ لكل ١٠٠ ست فى السنة الى ٠,١ لكل ١٠٠ ست فى السنة الواحدة)

Name	Progestin base	Price
Exluton ©	Lynestrenol 0.5	7.75
Levo-Nor	Levonorgestrel 0.03	7
Microlut ©	Levonorgestrel 0.03	10
Micronor ©	Norethisterone	13

الاقراص بتاعة وزارة الصحة هى **Levo-Nor** شريط ٢٨ قرص

يعنى لو قارنا تركيبة **Levo-Nor** بتركيبة **Microcept**، هلاقى ان الميكروسيبت تحتوى على 0.15mg Levonorgestrel بينما الليفونور بيحتوى فقط على 0.03mg Levonorgestrel يعنى ١/٥ الكمية الموجودة فى الميكروسيبت !

### أهم مشكلة هو نسيان حبوب الرضاعة؟ او الست ماخذتهاش فى ميعادها !

اولا لو الست اتاخرت اكثر من ٣ ساعات ⊕ عن ميعادها، دى بتعامل معاملة الست الى نسيبت حبوب الرضاعة ☞ الست دى تاخذ الحباية اول ماتفتكرها "وممكن تاخذ حبايتين مع بعض لو اتاخرت يوم كامل عن اخذ الحباية" وتستخدم وسيلة أخرى لمنع الحمل لمدة ٤٨ ساعة "يومان" زى (منع الجماع - الواقى الذكرى - **Contraseed vaginal supp**)

لو الست **بتجيلها الدورة بانتظام** مع الاستعمال المستمر لحبوب الرضاعة، وحدث جماع فى الخمس ايام السابقة لنسيان الحباية ☞ تستعمل اقراص منع الحمل الاضطرارية **Contraplan II 1x2** ثم تكمل على حبوب الرضاعة بعد ١٢ ساعة من استخدام **Contraplan II** وتستعمل وسيلة منع حمل اخرى لمدة يومان زى (منع الجماع - الواقى الذكرى - **Contraseed vaginal supp**)

لو الست رجعت "قىء" فى خلال ساعتين من تناول الحباية ☞ تاخذ حباية ثانية، لو رجعت تانى، تاخذ حباية تانى بعد استعمال اقراص ضد التراجع زى البريمبران **Primperan tablet** وترجع تاخذ حباية ثانية وماتنساش تخليها تستعمل وسيلة منع حمل اخرى لمدة يومان

### المشاكل فى دم الدورة الشهرية؟

#### عدم نزول دورة شهرية مع حبوب الرضاعة؟

لو الست بترضع 100% breastfeeding especially if exclusive: طمن الست وقولها ده عادى وموجود فى ٦٠% من الستات الى بترضع طبيعى والدورة هتفضل مقطوعة لحد الشهر السادس وممكن تفضل مقطوعة لحد ماتكلمى السنة ودى مافيش منها خوف بس انت لازم تفضلى تاخدى الحبوب بانتظام علشان مايحصلش حمل !

لو الست مبترضعش not lactating: طمنها بعد ماتستثنى وجود حمل، وبعد ماتطمئن على انها بتاخذ حبوب الرضاعة بانتظام وفى نفس الميعاد كل يوم، قولها ان ده عادى وان الدورة هترجعها تانى بمجرد ماتوقف الاقراص وده مافيش منه اى مشاكل وان ده مش معناه وجود اى مشاكل معايا بس هى لازم تفضل تاخذ حبوب الرضاعة بانتظام علشان مايحصلش حمل .

#### حدوث تنقيط او نزيف غير منتظم فى وسط الدورة الشهرية Metrorrhagia

الاول اتأكد انها بتاخذ حبوب الرضاعة بانتظام وفى نفس الميعاد كل يوم، لو الدنيا ماشية سمبتيك خلاص طمنها وقولها ان ده شيء عادى ويحصل مع اغلب الستات الى ماشية على حبوب الرضاعة فى اول ٣ شهور وان الدم ده هيفتقى مع الاستمرار المستمر لحبوب الرضاعة، وان الرضاعة الطبيعية فى حد ذاتها هى نفسها بتعمل تنقيط او عدم انتظام فى الدورة وبالنسبة ليها هى ممكن تاخذ الروشة دى لحد مالتنقيط يقف

- ✖ قرص ٣ مرات يوميا حتى توقف النزيف **Ponstan-Forte 500 / Brufen-Retard 800**
- ✖ قرصين ٣ مرات يوميا حتى توقف النزيف **Kapron 500**
- ✖ قرص ٣ مرات يوميا حتى توقف النزيف **Dicynone / Haemostop 250**
- ✖ قرص ٣ مرات يوميا حتى توقف النزيف **Dafon / Dafrex 500**
- ✖ علشان مايحصلش انيميا ➔ كبسولة مرة واحدة بعد الغداء لمدة ٩٠ يوم **Haemoton caps**

لو النزيف فضل موجود بعد ٣ شهور (٨٤ يوم من الاستعمال) او ظهر بعد هذه الفترة (ماكنش موجود وظهر بعد مرور ٣ شهور) ⇨ استثنى اولا اى سبب عضوى سواء general / local / obstetric cause لهذا النزيف، بعدها لو مالفيتش سبب ⇨ ياتحولها على اخصائى نسا وولادة علشان يعرف المشكلة ايه بالظبط او ممكن تغيرلها نوع حبوب الرضاعة الى ماشية عليها بدل الليفونور **Levo-Nor** ماشيها على **Micronor** وشوف النزيف هيتظبط ولا لا

### دورة شهرية ثقيلة او طويلة Menorrhagia

دى لازم تنظم ١٠٠% ان مافيش عندك اى مشكلة تانية عضوية هي السبب فى النزيف من اول مرة ولازم تتأكد ان الست ماشية على الحبوب بانتظام وبتاخدها فى نفس الميعاد والا تستثنى نزيف مع الحمل ⇨ لو مالفيتش اى سبب اكتبها على رويشتة النزيف المعتادة لو الست لم تستجيب او الموضوع ده بدء بعد ٣ شهور من استعمال حبوب الرضاعة ⇨ حولها لاختصاصى نسا وولادة

### صداع Headache

الاول بدور على سبب عضوى للصداع لان الصداع نادر جداً انه يحصل مع حبوب الرضاعة لكن لو مالفيتش اى سبب عضوى وارتبط الصداع باخد حبوب الرضاعة بكتبها على مسكن زى

✎ قرص ٣ مرات يوميا عند اللزوم **Ibuprofen 400 1x3 e.g. Brufen 400 tablet**

✎ قرص ٤ مرات يوميا عند اللزوم **Paracetamol 500 1x4 e.g. Cetal 500 tablet**

لو لم تستجيب ⇨ حولها على اختصاصى باطنة عامة / نفسية وعصبية على حسب ماتقضيته الحاجة

### الام بالثدى Mastalgia

لو الست بترضع Lactating ⇨ تعامل معاملة الام الثدي مع الرضاعة mastalgia with breast feeding

دى حته جراحة بس انا دايمما بحب اشرحها فاستحملوني

جاتلك واحدة ست بترضع وبتقولك فيه وجع فى صدري أنت عايز تعرف دى ايه؟ هتكشف على صدرها والله من بس المنظر هتعرف تفرق انت عندك ٤ مراحل لالتهابات الثدي فى الستات

#### المرحلة الاولى milk engorgement:-

دى الست بتبقى لسة والدة قريب والطفل لسة مش خبير قوى فى الرضاعة فيرضع حبة صغيرة وينام وهي اكمنها مش خبرة مابتعصرش صدرها بعد الرضاعة او بترضع من ناحية واحدة يقوم صدرها الى مابترضعش منه كويس يتملى باللبن فالبلدى كدة يخنزر ويوجعها ⇨ تيجى تبص على صدرها تلاقية منفوخ زى البالونة Tense وكله بيوجعها لكن اكثر فى جزء معين شوية صغيرة، تنك على صدرها تلاقى سيل منهمر من اللبن صدرها دافى بس مش سخن ومش محمر ولا عندك axillary L.N ولا هي بتسخن no fever ⇨ علاجها تعصر صدرها هتقولك مش قادرة تفهمها انها لو ماعصرتش صدرها كويس هيعمل خراج وتخش عمليات، تعصر صدرها على الاقل كل ٤ ساعات يعنى ٦ مرات فى اليوم وتكتبها على مسكن كويس بس يكون خفيف على معدة الطفل الى بترضعه زى **Cetafen** اقراص

#### المرحلة الثانية acute lactational mastitis

دى المدام الى فانت سابت نفسها من غير ماتعصر صدرها او الالعين لو الطفل طلعه سنان على آخر السادس كدة فالولد يرضع شوية ويعض فى الحلمة شوية فيعملها nipple fissure تدخل معايا infection او لو الام مهملة فى نفسها المهم دى هتجيك برده بوجع فى صدرها ⇨ هتبص عليه هتلاقية كله red & congested واكثر حته حمرا هي Peri-areolar area تحتط ايك عليه هتلاقى صدرها congested و سخن Hot وكله بيوجعها وممكن تلاقى axillary L.N صغيرة كدة وهتلاقى جسمها دافى Low grade fever ⇨ دى علاجها Antibiotic against staph زى الهابيوتيك **Hibiotic 1gm 1x2** + مسكن قوى زى **الفولتارين** "مش مهم معدة الطفل دلوقتى" + تعصر صدرها كويس جدا ليه لان البكتيريا بتتغذى على اللبن الى موجود فى صدرك يامدام فعلى ان الالتهاب ده مايقلبش خراج وتفتحى صدرك فى العمليات

#### المرحلة الثالثة Acute breast abscess

دى غالبا واحدة ست مهملة فى نفسها Low socio-economic standard بالرغم من ان كل الحالات الى انا شوفتها كانت فى مصر الجديدة، دى بقا واحدة ست بدء الموضوع معاها بالتهابات لبنية فى الثدي وماكملتش العلاج، ماخذتش العلاج كويس، ماعصرتش صدرها المهم ⇨ دى هتقولك كلمة جامدة جداً صدري بينفج عليا ومش مخلينى اعرف انام ومسخنى severe throbbing pain with fever

الكلمة المهمة قوى ومش قادرة حد يلمسه ولا البس هدوم عليه ➔ هتيجى تبص عليها تلاقى صدرها محمر بس الاحمرار Localized at "point" one quarter يعني هتلاقى حثة معينة حمرا اوى فى صدرها، صدرها كله بيوجعها بس لما تلمس الحثة دى تصوت وتفضحك وصدرها مولع نار واكثر حثة سخنة هي الحثة الحمرا دى ➔ دة كدة خراج فى الثدي والف مبروك يامدام هتتحجزى عمليات علشان نفتحهولك under general anesthesia

#### المرحلة الرابعة chronic breast abscess

نفرض الست الى فاتت جاتلك يابو العريف وانت ماعرفتهاش ومشيتها على medical treatment على اساس انها Acute lactational mastitis او هي اهملت فى نفسها زيادة وراحت لعم محمد فتحولها تحت بير السلم او دكتور امتياز حب يفتحها فقام فتحها outpatient بامبول ميباكين او هي كانت حالتها المادية تصعب على الكافر فجابت لبخة وحطتها او الدكتور الى فاتحها الخراج كان مايراعيش ربنا .... قصص قصص ➔ المهم دى واحدة جالها خراج فى الثدي وماتعالجتش كويس، المهم دى هتيجى بكلوعة فى صدرها، الكلوعة دى لما تتك عليها توجعها tender، كل ٥ - ١٠ - ١٥ يوم تقولك الكلوعة دى تخلى صدرى يوجعنى اوى during rest، وتسخرنى شوية، تروح واخدة مسكن و كبسولتين **فلوموكس** الوجع يخف بس الكلوعة لسة موجودة هي هتجيك طبعاً انت هتشك فى ايه؟ هتشك انها breast cancer وانك خلاص هتشخص mastitis carcinomatosa فهتبعثها تعمل sono-mamography هيقلوك انها cystic breast mass with fibrous wall وانها غالبا chronic breast abscess ➔ دى طبعاً هتحولها لاختصاصى جراحة علشان يعملها excision ويشيلها mass المهم انها بعد ما تتشال لازم يتعملها histopathology علشان اتأكد انها benign lesion

المهم بقا لو الست كانت مايترضعش بس بتستخدم حبوب الرضاعة ➔ دى اتأكد الاول ان مافيش معايا اى organic lesion زى fibroadenosis (ANDI) او mass lesion ➔ لو الدنيا كويسة بنطمناها ونقولها ان الوجع دة عادى مع حبوب الرضاعة وان التقل والوجع الى فى صدرها ده هيقل مع الاستعمال المستمر للأقراص وبنديها تعليمات (تعمل كمادات مية دافئة على صدرها - تلبس حمالة صدر ترفع صدرها شوية وتكون من القطن ومافيهاش كلبسات معدن الكلبسات تكون بلاستيك وتكتبلها على مسكن خفيف علشان الوجع زى البروفين **Brufen** قرص ٣ مرات يوميا عند اللزوم)

#### وجع شديد أسفل البطن - شك فى حمل خارج الرحم Ectopic؟

بسبب ان العيانة عندها amenorrhea بسبب الاستعمال المستمر لحبوب الرضاعة بدون توقف no withdrawal bleeding فالعيانة لو حملت مش هتعرف، فعلى ان كدة لو العيانة جالها وجع مرة واحدة تحت سرتها Shock  $\pm$  على طول افكر فى ectopic واول حاجة اعملها هي baby check لو طلع + ايجابى ➔ دى على طول U/S لو طلع فيه collection تبقى دى disturbed ectopic until proved otherwise

#### حمل مع حبوب الرضاعة؟

غالبا العيانة مش هتعرف الا لو حصلها مشكلة مع الحمل زى bleeding in early pregnancy الى هو العيانة بتستعمل حبوب الرضاعة بقالها فترة والدورة مبقتش تجيها، بعد مدة من استعمال حبوب الرضاعة جالها نزيف مهيلي او تنقيط ➔ رقم ١ يتعمل للعيانة دى هو اختبار الحمل ➔ طلع ايجابى (+) خلاص ده حمل ➔ تعمل سونار على الحمل سواء TVUS او Pelvic U/S وتوقف حبوب الرضاعة خالص ونقولها ماتخفش لان الحبوب غالبا مبتعملش تشوهات فى الجنين!

نجى للوسيلة الرابعة

#### (٤) حقن منع الحمل Injectable

أولا لازم نعرف الأول ان احنا اغلب كلامنا هيبقى على حقنة **Depo-Provera** الى هي حقنة ٣ شهور والى هي عبارة عن Depot form "Medroxyprogesterone acetate [DMPA]" 150mg of 1<sup>st</sup> generation progestin يعني ايه؟ دحقنة طويلة المفعول - بتمتص ببطء شديد جدا من العضلة - بنتحقق مرة كل 90 يوم  $\pm$  ١٤ ايام بس طبعاً علشان الست المصرية بتتعب ومابتلاحش وبتنسى فينقولها ان قدامها أسبوع ممكن تتأخر فيه او تيجى قبله على ميعاد الحقنة

الانواع الثانية من الحقن الى موجودة فى السوق المصرى

حقنة **Noricept** الى هي تركيبتها 200mg [NET-EN] "Norethisterone enanthate" 1<sup>st</sup> Generation progestin ودى الميزة الى فيها انها اخف فى حدوث النزيف والتنقيط breakthrough bleeding كمان اقل فى حدوث هشاشة العظام بس عيبها انها بتتاخذ كل شهرين ٦٠ يوم  $\pm$  ١٤ يوم ➔ للعالم فقط NET-EN injections are **not** approved for use as a contraception method by FDA till 2010... بمعنى ان لحد دلوقتى حقن منع الحمل الى فى امريكا هي **Depo-Provera** فقط

حقنة **Mesocept** او البديل التجاري ليها **Mesigyna** و تركيبتها Norethisterone acetate 50mg + Estradiol valerate 5mg المهم دى حقنة بتتاخد كل شهر ٣٠ يوم  $\pm$  ٥ ايام ودى لها نفس عيوب COC الا ان الميزة الوحيدة لها عن الاقراص هى مشكلة نسيان القرص مش موجودة فبتريح الست من مشكلة هل افكرت القرص ولا لا، ودى بتعامل معاملة اقراص منع الحمل المركبة فى موانع الاستخدام وطريقة الاستخدام والمشاكل المترتبة عليها فعلشان كدة احنا هنتشرح بس النوعين الى فوق الى هما Progestin only injectable الى هما الديوبروفيرا **Depo-Provera** و نوريست **Noricept**

ملحوظة هامة: حقنة **Depo-Provera** و **Mesocept** دول موجودين بالوحدات الصحية ومراكز تنظيم الاسرة "وزارة الصحة موفرهم" بينما حقنة **Noricept** و **Mesigyna** دول موجودين فى الصيدليات الخارجية وتمنهم ١٥ جنية للحقنة تقريبا

### ايه هى مميزات حقنة الـ ٣ شهور؟

- (١) ممكن الى بترضع تستخدمها بدون مشاكل مع الرضاعة الطبيعية
- (٢) ميزتها اكر انها بتتاخد مرة واحدة كل ٣ شهور يعنى العيانة لابتنسى الحباية ولا ملتزمة انها تفضل تاخذ الحباية فى نفس الميعاد كل يوم ولو اتاخرت اكر من ٣ ساعات تستعمل وسيلة وقاية تانية مع الحبوب لمدة يومين فبتريح العيانة من عناء أخذ الحباية كل يوم فى نفس الميعاد بالظبط خاصة فى اول ٦ شهور مع الرضاعة

### عيوب حقنة ٣ شهور Depo-Provera؟

- (١) الأعراض الجانبية "التنقيط وخلافه" أكثر حدوثا من حبوب الرضاعة لأن الهرمون مايبمتصش من العضلة كل يوم بنفس الكمية.
- (٢) كمان لما الست بتوقف الحقن بعد استخدامها لفترة اطول من سنة، الدورة مابتجعلهاش على طول وممكن تاخذ من ٦ شهور الى سنتين لحد مالدورة ترجع وتتنظم تانى فعلشان كدة مش محبب ان الستات تمشى عليها لفترة طويلة
- (٣) كمان لقوها بتزود نسبة حدوث هشاشة العظام osteoporosis فى الستات مع الاستخدام الطويل لفترة اكر من ١٠ سنوات، او الاستخدام بعد سن ٣٥ سنة، بس الميزة ان بمجرد ماتوقف الحقن، التأثير دة بيبدة يختفى

### موانع استعمال حقنة Depo-Provera

بسبب ان نسبة الهرمونات الى فيها عالية فممنوعة فى بعض الحالات زى اقراص منع الحمل المركبة؟

- (١) التى ترضع ومر على ولادتها اقل من ٦ اسابيع (قبل الاربعين)
- (٢) التى لاترضع ومر على ولادتها اقل من ٤ اسابيع (شهر)
- (٣) مريضة الكبد المزمن وتليف الكبد hepatic
- (٤) عندها المرارة - جالها الصفرا مع الحمل او مع اقراص منع الحمل المركبة - jaundice
- (٥) جالها سرطان الثدي او بتتعالج منه breast cancer
- (٦) مريضة الضغط المرتفع خاصة لو الضغط اعلى من ١٦٠/١٠٠
- (٧) المريضة الى بتتعالج من السكر لمدة اكبر من ٢٠ سنة او عندها السكر وعمل عندها مشاكل زى (مشاكل فى الكلى - مشاكل فى الرؤية - قدم سكرى - قصور فى الاوعية الطرفية.... الخ) Diabetic
- (٨) جالها جلطة فى اوردة الساق قبل كدة DVT
- (٩) جالها جلطة فى الشريان الرئوى "سدة رئوية" قبل كدة PE
- (١٠) عندها مشاكل فى القلب IHD / CAD
- (١١) جاتلها جلطة فى المخ Stroke
- (١٢) عندها عوامل خطورة متعددة للاصابة بجلطات فى القلب او فى المخ high risk factors for CVA or MI
- (١٣) عندها انقطاع فى الدورة بدون تفسير undiagnosed amenorrhea

### أمتى تاخذ حقنة Depo-Provera

لو الست بيجيها الدورة عادى ومابترضعش: فى اول ٧ ايام من نزول دم الدورة "الحيض" يفضل فى اليوم الخامس، لو مر عليها اكر من ٧ ايام اتأكد ان مفيش حمل exclude pregnancy وممكن تاخذها عادى بس تستعمل وسيلة منع حمل اضافية لمدة ٧ ايام زى (منع الجماع



- الواقي الذكري - **Contraseed** vaginal pessary) ولو حصل جماع فى الـ ٣ ايام الى فاتو تستعمل وسيلة منع حمل اضطرارية

## **Contraplan II**

لو الست والددة وبترضع: تستنى لحد بعد الاربعين (بعد ٦ اسابيع)، لو اتاخرت عن ٦ اسابيع تعامل معاملة الست الى ماجتلهاش الدورة

لو الست والددة وميترضعش: تستنى لحد آخر الشهر (بعد ٤ اسابيع)، لو مر عليها اكثر من ٤ اسابيع تستنى لو الدورة جاتلها تعامل معاملة لست الى ببجلها الدورة عادى لو الدورة مجتلهاش انظر التالى

لو الست الدورة مابتجلهاش نتيجة الرضاعة او اى سبب آخر: الاول اتأكد ان مفيش حمل baby check -ve بعدها ممكن تاخذها عادى بس

تستعمل وسيلة وقاية أخرى لمدة ٧ ايام (اسبوع) ولو حصل جماع فى ٣ ايام الى فاتو تستعمل **Contraplan II 1x2**

لو الست متحولة من وسيلة تانية (COC - POP - Implanon) بمجرد ايقاف الوسيلة التانية طالما انت متأكد انها ليست حامل baby check -ve لاحاجة لاستعمال وسيلة وقاية أخرى

## **مشاكل الحقن الشهرية Depo-Provera**

### **التأخر عن ميعاد الحقنة؟**

من الآخر حقنة **Depo-Provera** بتدينى حماية لمدة ٩٠ يوم + ٢٨ يوم يعنى لمدة ٤ اسابيع كمان بعد الحقنة، فعلشان كدة احنا بنقول للعيانة متتأخرش عن ميعاد الحقنة اكثر من اسبوع او ١٠ ايام بالكثير، بالنسبة لحقنة **Noricept** دى بتدينى حماية لمدة ٧٠ يوم = شهرين و ١٠ ايام فلو اتاخرت عن كدة، بتاخذها عادى بس الاول اتأكد ان مفيش حمل وتستعمل وسيلة حماية لمدة ٧ ايام ولو حصل جماع فى ٣ ايام

الماضية تستعمل **Contraplan II 1x2**

من الآخر، لو العيانة أتاخرت اكثر من اسبوعين (٤ يوم) عن ميعاد الحقنة، تروح تاخذ الحقنة بعد ماستنتى وجود حمل baby check -ve بس تستعمل وسيلة وقاية تانية ضد الحمل (منع الجماع - واقى ذكرى + **Contraseed** vaginal supp) لمدة ٧ ايام، وتستعمل اقراص منع الحمل الاضطرارية **Contraplan II** قرص كل ١٢ ساعة لو كان حصل جماع فى ٣ ايام الى فاتوا

### **المشاكل فى دم الحيض "الدورة الشهرية"**

#### **تنقيط او نزيف مع حقنة Depo-Provera؟**

المشكلة دى غالبا بتحصل فى اول حقنة "اول مرة" وممكن مع تانى حقنة بس نادرة جدا بعد ٦ شهور من الاستعمال، اكثر شكوى هى حدوث تنقيط لفترات طويلة فى غير ميعاد الدورة breakthrough bleeding، غالبا بيبدء بعد ٢-٤ اسابيع بعد اول حقنة، الأول طمن الست بعد exclusion of other causes، لو مفيش معايا اى سبب واضح غير استخدام حقن Depo-Provera بكتبلها على روشة علاج النزيف المشهورة

✖ قرص ٣ مرات يوميا حتى توقف النزيف **Ponstan-Forte 500 / Brufen-Retard 800**

✖ قرصين ٣ مرات يوميا حتى توقف النزيف **Kapron 500**

✖ قرص ٣ مرات يوميا حتى توقف النزيف **Dicynone / Haemostop 250**

✖ قرص ٣ مرات يوميا حتى توقف النزيف **Daflon / Dafrex 500**

✖ علشان مايحصلش انيميا كبسولة مرة واحدة بعد الغداء لمدة ٩٠ يوم **Haemoton caps**

لو التنقيط ماتحسنش على الروشة دى او فضل يتكرر على العيانة، بتأكد الأول ان مفيش اى سبب عضوى organic cause بعدها، بكتبلها على estrogen وافهمها انها لما هتوقف الاقراص الزيادة دى ممكن يحصل نزيف بعدها بس هيبقى اقل من النزيف الى موجود، بكتبلها على Premarin 0.625mg قرص مرة او مرتين يوميا لمدة اسبوعين "١٤ يوم"، او ممكن اكتبها على اقراص منع الحمل المركبة COC قرص مرة واحدة يوميا لمدة اسبوعين "١٤ يوم"

لو النزيف فضل موجود مع الحقن كل ٣ شهور، ياما اخليها تاخذ حقنة **Depo-Provera** كل شهرين (٨ اسابيع = ٦٠ يوم) يعنى تاخذها قبل ميعادها بشهر، او تاخذ الاحسن منها حقنة **Noricept** كل شهرين، او تستعمل الحقن المركبة **Mesocept** حقنة كل شهر (٢٨ يوم)

لو النزيف ظهر مع الحقنة التانية او الثالثة، او فضل موجود بالرغم من استعمال estrogen حول الحالة لاختصاصى لمعرفة سبب النزيف

## انقطاع الدورة Amenorrhea

غالبا يحصل بنسبة كبيرة (اكثر من ٩٠% من الستات) مع الاستعمال المستمر للحقن الشهرية، طمن الست وقولها ان ده مفيش منه اى مشاكل خالص، ده كمان بيقلل حدوث الانيميا فى الستات، لكن مشكلة الستات هو انقطاع الدورة amenorrhea حتى بعد توقف الحقن، اكثر من ٥٠% من الستات بيستتوا لحد سنة لحد مالدورة تبدا ترجع تانى وحوالى ١٠% من الستات الى بتستعمل الحقن ممكن تقعد سنتين لحد مالدورة ترجع تانى، فى الاغلب الدورة بترجع بعد ٦ شهور الى سنتين من ايقاف الحقن، علشان كده لايفضل استخدام الحقن فى السن الصغير علشان لو احتاجت تخلف بتستنى سنة كاملة قبل مايبدا يحصل ovulation و endometrium يبقى كويس implantation

## زيادة فى الوزن overweight

بسبب ان الحقنة فيها هرمونات Progestin بنسبة عالية فيتزود الوزن، لكن احنا بنقول للست الوزن ده مشكلة طبيعة أكل وانها المفروض تقلل من الأكل الى بيزود الوزن زى الاكل المسبك والدهون والنشويات وتزود الفواكه والخضروات فى الأكل، واحسبها average weight الى هيا المفروض تكون عليه الى هو بيساوى = ٢٢,٥ × الطول بالمتر × الطول بالمتر !

## هشاشة العظام

دى اكبر مشكلة للحقن الشهرية، انها بتزود حدوث هشاشة العظام فى الستات بعد انقطاع الطمث menopause، لكن التأثير ده temporary بيختفى بمجرد ايقاف استخدام حقنة Depo-Provera، التأثير ده اكثر فى الستات الى بتستعمل الحقن لمدة أكثر من ١٠ سنوات، ولو ان الابحاث بنقول بانه بيظهر بعد عام واحد من الاستعمال، والتأثير ده أقل مع حقنة Noriccept "حقنة الشهرين"، واكثر حدوثا فى الستات الرفيعين (Slim (BMI < 20... فعلى كده لايفضل استعمال الحقن الشهرية لفترات طويلة أكثر من سنتين، او فى سن صغير، او لو الست عمرها اكبر من ٣٥ سنة يفضل انها تستعمل وسيلة تانية زى حقن Mesocept الى هيا اقلهم فى حدوث هشاشة العظام، لو الست قررت انها تمشى على حقن Depo-Provera لفترات طويلة أكثر من سنتين، بانصحها تزود الأكلات الى فيها كالسيوم وفيتامين (د) Vit D زى (السك خاصة التونة - الرنجة - السردين - صفار البيض - الكبد - اللبن - منتجات الالبان زى الزبادى - الخضروات الورقية زى الجرجير، الكسبرة - البقدونس - الفجل - الكرات - البروكلى..... الخ)

## آلام "وجع" بالثدى

تعامل معاملة آلام الثدي مع حبوب الرضاعة POP انظر حبوب الرضاعة

## صداع Headache

نادراً انه يحصل، بس لو حصل بتأكد انه مش صداع نصفى باعراض منذرة classic migraine او نتيجة ارتفاع فى الضغط HTN بعد كده بكتبلها على مسكن زى سيتافين بلس **Cetafen Plus** قرص ٣ مرات يوميا عند الزوم

نيجى بقا للوسيلة الخامسة

## (٥) كبسولات تحت الجلد Implants

الكبسولات دى لها قصة كده علشان نعرف حكايتها... بص ياسيدى وياستى، الأول شركة اسمها Wyeth عملت حاجة اسمها **Norplant** دى كانت عبارة عن ٦ كبسولات بتتحت تحت الجلد فى الزراع الايسر وبتدنى حماية لمدة ٥ سنوات (٦٠ شهر)، هيا تركيبتها عبارة عن "Levonorgestrel 2<sup>nd</sup> Gen progestin" ومافيش اى estrogen خالص، والبروجستين ده متغطى بطبقة من polymer بيخلى امتصاص البروجستين بطيء للغاية ويحافظ على نسبة الأمتصاص ثابتة جداً من اول يوم بيتحت تحت الجلد، كان فيه مميزات بالهبل، هنقولها بعدين منها (بيتحت مرة واحدة كل ٥ سنين - مبيأثرش على الرضاعة - احسن فى الحماية من الحمل من حتى الاقراص المركبة - مابيعملش هشاشة عظام - مش ممنوع فى مرضى السكر والضغط..... الخ)، لكن ايه بقا فى سنة ٢٠٠٢ جت شركات المحاماة فى امريكا بدئت ترفع دعوائى قضائية بالهبل بنقول فيه ان **Norplant** كان السبب فى حدوث امراض عديدة للستات الى استخدمته وحط اى مرض من اول القولون العصبى لحد Astrocytoma الشركة طبعاً بدئت تدفع تعويضات للمتضررين من استخدام **Norplant** وحتى فى الدعاوى الى فشلت والشركة كسبتها كان على الشركة باعتبار انها لم ترضى المستخدم عليها انها تدفع تكاليف ازالة **Norplant** والى هو طبعاً فى الاف المستخدمين بيساوى ملايين الدولارات .... المهم الشركة وقفت الانتاج فترة و بعد كده لما رجعت تنتج تانى بقت تمضى المستخدمة على موافقة نصية written consent ان الشركة غير مسئولة عن اى ضرر يحدث فى المستقبل القريب او البعيد او يتم اكتشافه نتيجة استخدام هذه الكبسولات سواء منصوص عليها فى كتيب التعليمات ام لا (النشرة) وان على المستخدمة تحمل المشاكل والاعراض الجانبية نتيجة استخدام هذه الوسيلة لمنع الحمل، طبعاً لو انت بتقرا الموافقة دى ... دى تحسبك انك هتزرع قنبلة موقوتة فى جسمك مش وسيلة لمنع الحمل، فاستخدامه قل جداً جداً والثورة التى اتعملت علشانها انقلبت ضده وبقا اقل نسبة استخدام فى وسائل منع الحمل فى امريكا USA !

جاءت شركة Organon وقالت أنها صنعت حاجة احسن وهى **Implanon** ودة عبارة عن كبسولة واحدة فيها Etonogestrel 68mg ومتغطى بـ ethylene vinyl acetate co-polymer cover وان مشكلة الدعاوى القضائية ضد **Norplant** كانت بسبب ان الشركة لم تصرح عن نوع polymer الى بيغطى Levonorgestrel وان اغلب الدعاوى اعتبرت ان المشاكل الصحية الى حصلت للسيدات حدثت نتيجة polymer الى بيغطى البروجستين، كمان لان شركة Wyeth لم تكن صريحة فى كتابة الاعراض الجانبية لاستخدام كبسولات **Norplant** فى اعلانتها او حتى Package العبوة الى موجود فيها الـ ٦ كبسولات وادوات التركيب، وبالتالي كان ظهور اى اعراض جانبية لم تدرى بها المستخدمة سبب كافى لبدء دعوى قضائية ضد الشركة المصنعة - لأ وشركات المحاماة هناك ايه انت بس تقول انك عايز تشتكى والحل عندنا - فالشركة دى صنعت لنا كبسولة واحدة اسمها **Implanon** بتتحط برده تحت الجلد بس لمدة ٣ سنوات فقط تركيبها Etonogestrel "2<sup>nd</sup> Gen Progestin" 68mg والعبوة بتاعتها مكتوب فيها الاعراض الجانبية نتيجة استخدام **Implanon** وطريقة تركيبها وطريقة ازلتها وان cover الى بيغطى Etonogestrel يعتبر inert material بس ممكن يعمل local tissue reaction من اول شوية حكة irritation & itching لحد Chronic abscess & scarring fibrosis بس مالوش اى systemic side effects لانه لايمتص داخل الجسم، بس برده المستخدمة "المنتفعة" قبل ماتركبه يتمضى على موافقة نصية على اساس انها موافقة على اجراء جراحى صغير يتضمن اعطاء مخدر موضعى وحقن الكبسولة تحت الجلد وانها عارفة الاعراض الجانبية لاستخدام الكبسولة، زيتها زى اى حد بيعمل عملية جراحية صغيرة فى امريكا..... فاستخدام **Implanon** بدء يرجع الكبسولات تحت الجلد للنور تاني !

لما الشركات لقت كدة راحت شركة Schering / Bayer صنعت النوع الثالث **Jadelle** ودة عبارة عن كبسولتين (٢) تركيبتهن Levonorgestrel "2<sup>nd</sup> Gen Progestin" بيتحطوا لمدة ٥ سنوات (٦٠ شهر) ودول تم تصميمهم علشان يلغوا **Norplant** من السوق ويتحطوا مكانهم لان خلاص **Norplant** سمعتها بقت وحشة ← شركة Wyeth دى جزء من شركة Schering #

المهم الكلام الجد... النوع الوحيد الى موجود فى مصر حاليا هو **Implanon** ودة عبارة عن كبسولة واحدة تركيبته Progestin only "Etonogestrel 68mg" بتتحط تحت الجلد فى الجانب الداخلى للذراع الايسر بواسطة طبيب متدرب، وبعد ٣ سنوات (٣٦ شهر) بتشيل الكبسولة وتحط كبسولة جديدة فى الذراع الآخر "الايمن" لمدة ٣ سنوات اخرى علشان المكان الى الكبسولة بتتحط فيه بيحصل مكانه Fibrosis، بعد ٣ سنين بتشيل الكبسولة من الذراع الايمن وتركب كبسولة جديدة فى الذراع الايسر فوق او تحت مكان الكبسولة القديمة وهكذا.... كل ٣ سنين، الكبسولات دى وزارة الصحة المصرية موفرها مجاناً فى عيادات تنظيم الاسرة

### إيه بقا مميزات **Implanon**؟

- (١) مبيأثرش على الرضاعة، ممكن الست تركيبها وهى بترضع مفيش منه اى مشاكل
- (٢) وسيلة بتتحط مرة واحدة لمدة ٣ سنوات، يعنى لا الست تنسى ولا تقعد تفكر خدت القرص ولا ماخذتوش
- (٣) مابتعملش هشاشة عظام زى الحقنة الشهرية **Depo-Provera**
- (٤) اول مالست تشيلها الدورة بترجعها على طول ... مفيش حتى post pill amenorrhea الى بتحصل مع الاقراص المركبة
- (٥) أأمن وسيلة فى منع الحمل، نسبة الحمل عليها ١ لكل ٢٠٠٠ حالة فى اول عام ! ولايوجد فرق بين typical use & perfect use
- (٦) مبيأثرش على الجماع زى الواقى الذكرى
- (٧) مبيحصلش معاها حمل خارج الرحم ectopic وكل الدراسات اثبتت انها مبيتزودش نسبة حدوث حمل خارج الرحم زى اللولب او

### حقن **Depo-Provera**

- (٨) مابتزودش حب الشباب زى الاقراص المركبة COC وحقن منع الحمل **Depo-Provera**
- (٩) ممكن كل الاعمار تستعملها بامان
- (١٠) أمانة مع التدخين
- (١١) ممكن الستات الى عندهم الضغط او السكر تستعملهم عادي

### موانع استعمال **Implanon**؟

- (١) بعد الولادة باقل من ٦ اسابيع لو بترضع او اقل من ٤ اسابيع لو مبيتزودش
- (٢) أمراض الكبد المزمنة، تليف الكبد، التهاب مزمن فى الكبد Hepatic patient
- (٣) جاتلها صفرا مع الحمل او مع حبوب منع الحمل jaundice
- (٤) سرطان الثدي (اتعالجت منه او لسة بتتعالج) Breast cancer
- (٥) جاتلها جلطة فى اوردة الساق DVT
- (٦) جاتلها او بتتعالج من جلطة فى الشريان الرئوي "سدة رئوية" PE

٧) بتاخذ علاج للصرع

Phenytoin [Epanutin]

Carbamazepine [Tegretol - Neurotop - Tegral]

Oxycarbazine [Trileptal]

Phenobarbitone [Sominaletta]

Topiramate [Topamax]

### مين الست الى تقدر تستعمل Implanon؟

- ١) الست الى بترضع ومر على لادتها اكثر من ٦ اسابيع "بعد الاربعين" breastfeeding
- ٢) الست الى بتدخن smoking
- ٣) الست الى عندها الضغط HTN
- ٤) الست الى عندها السكر DM
- ٥) الست الى عندها عرضة لأمراض الشريان التاجي risk factor for IHD
- ٦) الست الى بييجلها صداع نصفي شائع common migraine

### امتى الست تقدر تستعمل Implanon؟

- ❖ لو الست والددة وبترضع: بمجرد مايعدي ٦ اسابيع (الاربعين) تقدر تركبها
- ❖ لو الست والددة postpartum ومابترضعش: بمجرد انتهاء ٤ اسابيع بعد الولادة (بعد شهر)
- ❖ لو الست بييجلها الدورة: ٥ يوم فى الدورة، لو مر اكثر من ٥ ايام وانت متأكد ان مفيش حمل، ممكن تركبها بس تستعمل وسيلة وقاية اخرى لمدة ٧ ايام (منع الجماع او واقي ذكري + **Contraceed vaginal supp**)
- ❖ لو الست مايجلهاش الدورة لأي سبب (رضاعة طبيعية ... الخ): تقدر تركبها بشرط التأكد انها مش حامل baby check -ve و تستعمل وسيلة وقاية اخرى لمدة ٧ ايام (منع الجماع -أو- واقي ذكري + **Contraceed vaginal supp**)
- ❖ لو الست متحولة من وسيلة منع حمل هرمونية اخري: بمجرد ايقاف الوسيلة الاخري (الاقراص المركبة - حبوب الرضاعة) بعد التأكد انها مش حامل baby check -ve ولاحتاج لاى وسيلة وقاية اخرى
- ❖ لو الست متحولة من اللولب: بمجرد ازالة اللولب بعد التأكد ان مفيش حمل babycheck -ve

نيجى بقا للكلام الى انت عايزة ايه هي

### مشاكل Implanon

#### اولا مشاكل فى مكان التركيب:-

#### اولا احنا لازم نعرف Implanon بيتركب ازاى؟

أولا الكبسولة بتجى فى عبوة مغلقة ومعها الجهاز الى بتتركب بيه، وكمان كتيب التعليمات ليك كمحترف professional ولست علشان تقراه وتعرف انت هتعمل لها ايه(الكتيب بالانجليزي طبعا).... الاول بتمسح المنطقة بقطنة بيثادين "تعقم الجلد" وبعدين تديها حقنة بنج موضعي mepacaine فى الجزء الى هتخط تحته الكبسولة، الكبسولة بتطلع متركة فى جهاز زى جهاز IUD ... هتتعلم من واحد اكبر منك ازاى بتحقن الكبسولة وانت ممكن تقرا الخطوات فى كتيب التعليمات الى بييجي مع العبوة، بعد ماتركبها بتلف دراعها بشاش طبي ± رباط ضاغط وتخليها تفضل رابطاه لمدة ٤ ايام علشان مايحصلش ورم مكان الكبسولة

بعد ماتركب الكبسولة هتفهم الست انها ممكن تحس بحكة وهرش او حرقان بعد مامفعول البنج يروح، فهمها ان الاحساس بالحرقان او الهرش ده هيروح بعد يومين ثلاثة بالكثير وانها لازم ماتهرش فى مكان التركيب والا الكبسولة هتنبوظ ودراعها هيورم ! ممكن فى الحالة دى تكتبلها علي مضاد للحساسية كمهدئ ومعاه مسكن زى الباراسيتامول (علي مضض)

ممكن يحصل للست حساسية فعلا مكان تركيب الكبسولة ودى هتلاقي الاحساس بالهرش بدء بمجرد تركيب الحقنة ودراعها احمر وورم... علاجها تشيل الكبسولة وماتستخدمش Implanon تاني

لو الست شالت الرباط الضاغط والشاش قبل ٤ ايام، ممكن مكان الكبسولة يورم ويزرق local hematoma formation دي بتحتاج مسكن ورباط ضاغط لمدة ٤-٥ ايام .... ممنوع تعمل عليها كمادات مياه دافئة او باردة ❄️

ممكن يحصل التهاب مكان تركيب الكبسولة ويظهر على هيئة احمرار وورم مكان الكبسولة ونقح "وجع" غالبا فى خلال عدة ايام هيحصل عليه خراج ويتفتح ويتشال الكبسولة او الكبسولة تطلع لوحدها مع الصديد، لو لسة في الاول "التهاب فقط" بنكتب للست على مضاد حيوي لمدة ٧ ايام زى الفيلوسيف **Velocef** اجم قرص / ١٢ ساعة، ومسكن زي البروفين **Brufen** قرص ٣ مرات يوميا عند اللزوم، وممنوع تعمل عليها كمادات مياه دافئة او باردة او تحط عليها لبخة (سواء مرهم اسمر Icthamol - لبخة كاولينا Koalin - لبخة طمي احمر mud) او مراهم .... اول مايجمع ويحصل pointing بنفتح الخراج وننظف الصديد ونشيل الكبسولة ونعالج المنطقة زى اى خراج عادي، ولو فرضاً (غير موجود فى الطبيعة) انها لسة عايزة تستعمل الكبسولات بنزرع لها كبسولة جديدة في الذراع الآخر.

ممكن الكبسولة نفسها يحصل عليها التهاب بسيط وبعد كام يوم تطلع برة لوحدها (غالبا فى اول ٤ شهور) ده بيبقى نتيجة تركيب غلط وفى الحالة بنركب كبسولة جديدة فى الذراع الثاني لو الست عايزة.

اصعب حاجة الي زرع الكبسولة زرعها Deep فلما تيجي تشيلها تحتاج تفتح فتحة طويلة وتبقى صعبة في شيلتها

فيه مشكلة صغيرة، انت هتقول للست طول مانت مركبة الكبسولة هتسبى بيها تحت الجلد، ده عادى المهم ماتهشيش ولا تلعبش في مكان الكبسولة والا مفعولها هيقل ويحصل عليها التهابات

ممكن الكبسولة تعمل scarring fibrosis مكانها حتي بعد ماتتشال فتسبب ugly scar تضايق الست الي مركباها ← تبقى تروح لدكتور تجميل يعالجها لها بالليزر او الصنفرة

ملحوظة: الحرارة بتأثر علي عمر الكبسولة علشان كدة هي يتنزع في الذراع من الجانب الداخلي لانه اقل فى التعرض لاشعة الشمس وحرارتها

### مشاكل فى الدورة الشهرية "دم الحيض"

#### **تتنقيط او نزيف متقطع في غير ايام الدورة Breakthrough bleeding**

المشكلة دي غالبا بتحصل في اول ٣ شهور بعد زرع الكبسولة، ويبقى النزيف كميته قليلة، بيبقى نتيجة ان الكبسولات لاتحتوي علي estrogen فده بيعمل اختلال في prostaglandins في endometrium، اول حاجة بنظمن الست reassurance ونفهمها ان النزيف دة هيقل مع الوقت لوحده لحد مايختفي خالص، بس هنكتبها علي رويشتة النزيف المعتادة، وأهم حاجة في الروشتة دي هي البونستان فورت **Ponstan-Forte** / البروفين ٨٠٠ **Brufen-Retard** قرص ٣ مرات يوميا حتى توقف النزيف

لو النزيف فضل موجود، او نسبته لم تقل مع رويشتة النزيف السابقة، بكتبها علي حاجة فيها استروجين estrogen لمدة ٢١ يوم زي

(١) الاقراص المركبة COC التي تحتوي علي Levonorgestrel 0.15mg زي اقراص **Microcept** قرص مرة واحدة يوميا لمدة ٢١ يوم

(٢) او Ethinyl-Estradiol 50µg اقراص (بنفس الاسم في السوق) قرص مرة واحدة يوميا لمدة ٢١ يوم

(٣) او **Premarin** 0.625mg قرص مرتين يوميا لمدة ١٤ يوم

لو النزيف أستمر أكثر من ٣ شهور ← ندور علي سبب عضوي، مالفيتش خلاص أغيرلها الوسيلة، بوسيلة Combined

لو النزيف ظهر بعد ٣ شهور من التركيب ← احولها علي اخصائي علشان يدور علي سبب عضوي للنزيف

#### **أنقطاع الدورة الشهرية Amenorrhea:**

أغلب الستات هيحصلهم انقطاع في الدورة بعد ٦ شهور من زرع الكبسولة، فهم الست وطمئنها ان الدورة هترجعها ثاني بمجرد ماتتشيل الكبسولة وأن دة مبيأثرش عليها ولا بيعمل عندها عقم ولا حاجة

#### **نزيف شديد في ميعاد الدورة Menorrhagia:**

دّة يحصل في أول ٣ شهور بعد تركيب الكبسولة و مع الوقت يقلّ لحد ما يختفي، بتكتبلها علي رويّة العلاج بتاعة النزيف عادي، ولو الست ماستريحتش بعد ٣ ايام والنزيف فضل شديد، ممكن اكتبلها علي حاجة فيها استروجين estrogen لمدة ١٤ - ٢١ يوم زي **Microcept** او Ethinyl-Estradiol 50µg قرص مرة واحدة يومياً لمدة ٢١ يوم

لو النزيف أستمّر أكثر من ٣ شهور ← دور علي سبب عضوي، مالفيتش خلاص أغيرلها الوسيطة، بوسيلة Combined

لو النزيف ظهر بعد ٣ شهور من التركيب او بعد انقطاع الدورة ← حولها علي اخصائي علشان يدور علي سبب عضوي للنزيف

### الصداع Headache

أقل وسيلة في حدوث الصداع ← لنظر الصداع مع حقن منع الحمل **Depo-Provera**

### آلام الثدي Mastalgia

أنظر الام الثدي مع حبوب الرضاعة POP

### الشك في حمل خارج الرحم Ectopic

بالرغم من انها أقل وسيلة فعلياً يحصل معاه حمل خارج الرحم Ectopic لكن الاحتمال وارد، فأني حالة جاية بوجع شديد تحت بطنها lower abdomen ومعاه نزيف spotting بعد انقطاع الدورة لازم اعملها اختبار حمل babycheck ← طلع ايجابي بعترها حالة ectopic until proved otherwise

لو لاحظتم هتلاقوها أقل وسيلة في الاعراض الجانبية

كدة احنا خلصنا تقريبا كل الوسائل ..... فاضلنا بقا وسائل منع الحمل الاستثنائية الي هما

(١) اقراص منع الحمل الاضطرارية Emergency contraception

(٢) مبيدات الحيوانات المنوية spermicides

(٣) الحلقات المهبلية المحتوية علي هرمونات vaginal ring

### أولا اقراص منع الحمل الاضطرارية Emergency Contraception

أحنا هنشرح يعني ايه Emergency contraception ... هي واحدة مثلاً جوزها كان مسافر وجة فجأة، او هي تأخرت عن ميعاد الحقن الشهرية أكثر من اسبوعين، او نسيت أكثر من ٣ أقراص من حبوب منع الحمل المركبة.... ورقم ١ بينكتب في الكتب الاجنبية "بعد الاغتصاب" ربنا يعافينا واياكم

أحنا عندنا كذا نوع من Emergency contraception

(١) اقراص تحتوي علي هرمونات Hormonal ودة نوعين

النوع الاول يحتوي علي Progestin فقط بس بجرعة عالية زي اقراص Contraplan II ودي بيسموها Plan B

النوع الثاني اني ادي اقراص منع الحمل المركبة التي تحتوي علي Levonorgestrel بس بجرعة اعلي Yuzpe method

(٢) وسيلة غير هرمونية Non hormonal ودي نوعين

الاول: اركب للست لولب IUD ودة هيمنع حدوث حمل

الثاني: ادي الست Prostaglandins فتمنع حدوث implantation ← most effective method (!)

## أولا الوسائل الهرمونية Hormonal method

أول معلومة لازم تعرفها، ان الوسائل الهرمونية كلها لازم تتأخذ في خلال ٣ ايام (٧٢ ساعة) من حدوث الجماع.... WHO بتقول انها برده effective في خلال ٥ ايام

### اقراص progestin فقط Contraplan II = Plan B

دي بيبقوا قرصين كل قرص يحتوي علي Levonorgestrel 0.75mg، الست بتأخذ قرص ساعة ماتجيك وبعد ١٢ ساعة بالظبط تأخذ القرص الثاني، بعدها بتكمل علي وسيلة منع حمل أخرى.... الاقراص دي موجودة في السوق تحت اسم **Contraplan II** ودي وزارة الصحة المصرية موفرها مجاناً في عيادات تنظيم الاسرة. ميزة الطريقة دي انها less side effects من الاقراص المركبة واقل في حدوث N & V و Headache... ونفس effect في تقليل الحمل واكثر في compliance ودلوقتي هي اكثر وسيلة بتستخدم كوسيلة اضطرارية

### الاقراص المركبة Yuzpe Method

دي كانت الطريقة القديمة وكانت اكثر طريقة بيحصل عليها اعراض جانبية اهمها الدوخة - الغثيان - القيء - الصداع، طبعاً من الواضح الي اخترعها راجل ياباني ايمه يوزبي، المهم الطريقة دي بتتعمل ازاى.... فيها كذا Regimen وكلهم approved اشهرهم والي موجودة في مصر ← الاقراص التي تحتوي علي EE + Levonorgestrel المفروض الست تأخذ جرعتين في الجرعة الواحدة EE 100µg + Levonorgestrel 0.5mg ← احنا عندنا اقراص COC الي هيا **Microcept** تركيبتها EE 30µg + Levonorgestrel 0.15 فالبتالي الجرعة هتبقى ٤ اقراص الآن ثم ٤ اقراص بعد ١٢ ساعة ☺

### عيوب الطريقة الهرمونية ومشاكلها

- ١) بتقل فعاليتها بعد ٣ ايام وبالتالي لازم تستخدم في خلال ٣ ايام من حدوث الجماع
  - ٢) اعراضها الجانبية كثيرة واهمهم الترجيع، علشان كدة الست لازم تأخذ حقن او اقراص للترجيع anti-emetic قبل اخذ الاقراص بـ ١/٢ ساعة
  - ٣) لاتوفر حماية مستقبلية، فلزام الست بعد ماتستعملها تستعمل وسيلة منع حمل أخرى للمدي الطويل
- أهم حاجة هي مشكلة الترجيع ← لو الست رجعت في خلال ساعتين بعد ماخذت اقراص منع الحمل الاضطرارية؛ عليها انها تأخذ القرص ثاني بعد ماتكون استعملت حاجة للترجيع زي **Primperan / Emetrex** ← الافضل هو Meclizine و Cyclizine زي **Navoproxine**

## الطريقة الغير هرمونية Non-Hormonal method

### أولا اللولب النحاسي IUD

الست بتركب اللولب بعد ماتتأكد ان مفيش حمل babycheck -ve وان ماعندهاش مانع لتركيب اللولب

#### مميزات الطريقة دي:-

- ١) أولاً ممكن تستخدم لحد ٥ ايام بعد حدوث الجماع
- ٢) الست بتركبه ومابتحتاجش وسيلة ثانية لمنع الحمل على المدى الطويل emergency + long lasting لمدة ١٠ سنوات
- ٣) مالوش الاعراض الجانبية بتاعة الطريقة الهرمونية الي هيا الغثيان - القيء - الدوخة - الصداع
- ٤) حتى لو حصل عليه حمل failure نسبة السقط بتبقى اعلي ٥٠% Abortion

#### عيوبه:-

- ١) بيجتاج دكتور متدرب لتركيبه
- ٢) ممكن يحصل مع تركيبه شوية الم ونزيف
- ٣) ممنوع في بعض الحالات زي abnormal anatomy

من الآخر IUCD هو perfect emergency contraception

### ثانيا اقراص Mefipristone

الكلام دة للعلم فقط.... هذه الوسيلة لاتستعمل في مصر ☹ (medicolegal)، ودي الوسيلة الي بتستخدم بعد الاغتصاب في امريكا !

الفكرة انها عبارة عن prostaglandins فبتمنع implantation وتعمل "artificial menses" menstrual induction، وبالتالي تمنع حدوث الحمل، بيعتبروه perfect emergency contraception لانه

- (١) failure rate أقل بكثير من الوسائل الهرمونية ٠,٠٦ %  
 (٢) كمان لان الاعراض الجانبية الى هيا الغثيان والقيء اقل من الاقراص الهرمونية  
 (٣) ولانه ممكن يتاخذ لحد ١٤ يوم (اسبوعين) بعد الجماع

الجرعة بتبقى عبارة عن قرص واحد فقط Mefipristone 100mg مرة واحدة فقط ← اسمه في السوق المصري **Mefoprist**

## (٢) مبيدات الحيوانات المنوية Spermicides

دي عبارة عن موانع للحمل Local ، بتتخط مع الواقي الذكري لتحسين الحماية ضد الحمل، لو اتاخذت لوحدها نسبة حدوث الحمل = FR = 29/HWY يعني من كل ١٠٠ سيدة هتستعملها ٢٩ سيدة هتحمّل عليها، اسمها في السوق المصري **Contraseed** vaginal supp عبارة عن لبوس مهبلي بيتخط قبل الجماع مباشرة بحوالي ١/٢ ساعة deep in the vagina near the cervix، مالوش اعراض جانبية سوى الاحساس بحكة او حرقان وممكن يزود حدوث infection سواء vaginal / UTI

## (٣) الحلقة المهبلية المركبة vaginal ring

دي عبارة عن حلقة من مادة مطاطية تحتوي علي Ethinyl-Estradiol + Etonorgestrel زي الاقراص المركبة، بتستعمل عن طريق انها بتتخط في اليوم الخامس من الدورة زي الاقراص المركبة deep in the vagina near the cervix، بتتخط مرة واحدة لمدة ٢١ يوم وبعدين تتشال بواسطة الست والست تستريح ٧ ايام وترجع تحطها ثاني، دي تعتبر وسيلة بديلة للاقراص المركبة COC...

أهم عيب فيها ان ٢٥% من الستات بيحسوا بيها مع الجماع و ٢٠% من ازواجهم بيحسوا هما كمان فيضايقوا من الاحساس ده لها نفس استخدام وعيوب وموانع ومشاكل الاقراص المركبة ! بس ميزتها انها بتتخط مرة واحدة كل ٢١ يوم + ٧ ايام راحة

**فئة مجموعة وسائل منع حمل لم نتطرق للحديث عنها وهي**

- ❖ Condoms and other barrier methods
- ❖ Combined skin patch ← مش متاحة في مصر
- ❖ Female sterilization "tubal ligation"
- ❖ Vasectomy

### REFERENCE FOR THIS CHAPTER

1. Williams Gynecology 23th Edition, 2008; Chapter 5. Contraception and Sterilization
2. Family Planning Global Handbook for providers 2011 by WHO
3. تنظيم الاسرة - الكتيب العالمي لمقدمي الخدمة ٢٠٠٧
4. المعايير القياسية لتقديم خدمات تنظيم الاسرة - دليل العمل لمقدمي الخدمة ٢٠١١
5. El-Mandouh lecture notes on Gynecology 2010
6. Practice Guidelines For Family Physicians 2007; Volume 2; Chapter 3: Family planning



هكذا انتهى الجزء الاول من هذه المذكرة ولله الحمد والمنة؛ ماكان من فضل فمن الله، وماكان من خطأ او نسيان فمني او من الشيطان